


甲

29441



本紀卷第二十

元史二十

翰林學士雷奕知制誥兼修國史臣朱灑翰林待制承直郎兼國史院編修官臣王禕等奉勅修

成宗三

三年春正月癸未朔暹番沒刺由羅斛諸國各以方物來貢賜暹番世子虎符丙戌太陰犯太白己丑中書省臣言天變屢見大臣宜依故事引咎避位帝曰此漢人所說耳豈可一一聽從耶卿但擇可者任之庚寅詔遣使問民疾苦除本年内郡包銀俸鈔免江南夏稅十分之三增給小吏俸米置各路惠民局擇

良醫主之封藥木忽而爲定遠王賜金印命中書省
自今后妃諸王所需非奉旨勿給各位擅置官府紊
亂選法者戒飭之辛卯詔諸行省謹視各翼病軍浙
西肅政廉訪使王遇犯賊罪託權幸規免命御史臺
鞠治之壬辰安置高麗陪臣趙仁規於安西崔冲紹
於鞏昌並笞而遣之以正其附王諛擅命妄殺之罪
復以王眡爲高麗王遣工部尚書也先鐵木而翰林
待制賈汝舟齎詔往諭之追收別鐵木而脫脫合兒
魯行軍印中書省臣言比年公帑所費動輒鉅萬歲
入之數不支半歲自餘皆借及鈔本臣恐理財失宜

鈔法亦壞帝嘉納之仍令諭月赤察而等自今一切
賜與皆勿奏癸巳以江南軍數多闕官吏因而作弊
詔禁飭之以荅刺罕哈刺哈孫爲中書左丞相丁酉
太陰犯西垣上將戊戌太陰犯右執法辛丑括諸路
馬隸蒙古軍籍者免之乙巳太白經天二月癸丑朔
車駕幸柳林丁巳完澤等奏銓定省部官以次引見
帝皆允之仍諭六部官曰汝等事多稽誤朕昔未知
其人爲誰今旣閱視且知姓名其洗心滌慮各欽乃
職復蹈前失罪不汝貸罷四川福建等處行中書省
陝西行御史臺江東荆南淮西三道宣慰司置四川

福建宣慰司都元帥府及陝西漢中道肅政廉訪司
廣和林甘州城詔縉山縣民戶爲勢家所蔽者悉還
縣定籍壬戌詔諭江浙河南北兩省軍民乙巳熒惑
犯五諸侯壬申加解州鹽池神惠康王曰廣濟資寶
王曰永澤泉州海神曰護國庇民明著天妃浙西鹽
官州海神曰靈感弘祐公吳大夫伍貞曰忠孝威惠
顯聖王金齒國遣使來貢方物庚辰車駕幸上都三
月癸巳緬國世子信合八的奉表來謝賜衣遣還命
妙慈弘濟大師江浙釋教總統補陀僧一山齋詔使
日本詔曰有司奏陳向者世祖皇帝嘗遣補陀禪僧
如智及王積翁等兩奉璽書通好日本咸以中途有
阻而還爰自朕臨御以來綏懷諸國薄海內外靡有
遐遺日本之好宜復通問今如智已老補陀寧一山
道行素高可令往諭附商舶以行庶可必達朕特從
其請蓋欲成先帝遺意耳至於博好息民之事王其
審圖之甲午命何榮祖等更定律令詔軍官受贓罪
重者罷職輕者降其散官或決罰就職停俸期年許
令自效戊戌熒惑犯輿鬼陞御史臺殿中司秩五品
乙巳行御史臺劾平章教化受財三萬餘錠教化復
言平章的里不花領財賦時盜鈔三十萬錠及行臺

中丞張閻受李元善鈔百錠敕俱勿問戊申減江南諸道行臺御史大夫一員賜和林軍鈔十萬錠夏四月辛亥朔駙馬蠻子台所部匱乏以糧十三萬石賑之己未太陰犯上將丙寅填星犯輿鬼太陰犯心庚午申嚴江浙兩淮私鹽之禁巡捕官驗所獲遷賞辛未禁和林戍軍竄名他籍自通州至兩淮漕河置巡防捕盜司凡十九所己卯以禮部尚書月古不花爲中書左丞賜和林軍鈔五十萬錠帛四十萬匹糧二萬石仍命和林宣慰司市馬五千匹給之遼東開元咸平蒙古女直等人乏食以糧二萬五百石布三千

九百匹癸之五月壬午罷江南諸路釋教總統所丙申太陰犯南斗海南速古臺速龍探奔奚里諸番以虎象及抄羅木舟來貢己亥太白犯畢庚子免山東也速帶而牧地歲輸粟之半禁阿而刺部毋於廣平牧馬庚子復征東行中書省以福建平海省平章政事闊里吉思爲平章政事是月鄂岳漢陽興國常澧潭衡辰沅寶慶常寧桂陽茶陵旱免其酒課夏稅江陵路旱蝗弛其湖泊之禁仍並以糧賑之六月辛亥兀魯兀敦慶童擅殺所部軍之逃亡者命樞密院戒之癸丑罷大名路所獻黃河故道田輸租戊午申禁

海商以人馬兵仗往諸蕃貿易者以福建州縣官類
多色目南人命自今以漢人參用禁福建民冒稱權
豪佃戶規免門役庚申太陰掩房丁卯熒惑犯右執
法壬申歲星晝見賜和林戍軍鈔一百四十萬錠鷹
師五十萬一千餘錠秋七月己卯朔太白犯井庚辰
中書省臣言江南諸寺佃戶五十餘萬本皆編民自
揚總攝冒入寺籍宜加釐正從之丙申揚州淮安屬
縣蝗在地者爲鶩啄食飛者以翅擊死詔禁捕鶩丁
未太陰犯輿鬼八月己酉朔日有食之丁巳太陰犯
箕戊辰太白犯軒轅大星己巳太陰犯五車星賜定

遠王藥木忽而所部鈔萬五千錠是月汴梁大都河
間水隆興平灤大同宣德等路雨雹九月癸未聖誕
節駐蹕古柵受諸王百官賀庚寅置河東山西鐵冶
提舉司壬辰流星色赤尾長丈餘其光燭地起自河
鼓沒於牽牛之西有聲如雷癸巳罷括宋平虢軍乙
未太陰犯昴距星丁酉太白犯左執法己亥車駕還
大都揚州淮安旱免其田租冬十月戊申朔有事于
太廟壬子冊伯岳吾氏爲皇后甲寅復立海北海南
道肅政廉訪司山東轉運使阿里沙等增課鈔四萬
一千八百錠賜錦衣人一襲丙子太陰犯房賜禿忽

魯不花等所部戶鈔三萬七千餘錠橐駝戶十萬二千餘錠以淮安江陵沔陽揚廬隨黃旱汴梁歸德水隴陝蝗並免其田租十一月庚辰置浙西平江河渠閘堰凡七十八所禁和林釀酒乙酉太白犯房戊子釋囚二十人丁酉浚太湖及澱山湖己亥賜隆福宮牧駝者鈔十萬二千錠諸王合帶部十萬錠雲南王也先鐵木而及所部三萬八千錠和林戍軍一百四十萬餘錠幣帛二萬九千匹杭州火江陵路蝗並發粟賑之十二月己酉徙鎮巢萬戶府戍沅靖毗陽萬戶府戍辰州均州萬戶府戍常德禮州賜諸王岳忽

難銀印丙寅詔各省戍軍輪次放還二年供役陞宣徽院爲從一品癸酉詔中書省貨財出納自今無券記者勿與以守司徒集賢院使領太史院事阿魯渾撒里爲平章政事賜諸王六十脫脫等鈔一萬三千餘錠四怯薛衛士五萬二千餘錠千戶撒而兀魯所部四萬錠淮安揚州饑甘肅亦集乃路屯田旱並賑以糧

四年春正月丙申申嚴京師惡少不法之禁犯者黥刺杖七十拘役辛丑詔蒙古都元帥也速答而非奉旨勿擅決重刑命和林戍軍借斡脫錢者止償其本

癸卯復淮東漕渠賜諸王塔失鐵木而金印賜翰林承旨僧家鈔五百錠以養其母賜諸王木忽難所部一萬二千餘錠八魯刺思等部六萬錠二月丁未朔自有食之乙卯遣使祠東嶽丙辰皇太后崩明日祔葬先陵戊午太陰犯軒轅壬戌帝諭何榮祖曰律令良法也宜早定之榮祖對曰臣所擇者三百八十條一條有該三四事者帝曰古今異宜不必相沿但取宜於今者甲戌發粟十萬石賑湖北飢民仍弛山澤之禁罷稱海屯田改置於呵札之地以農具種實給之乙亥車駕幸上都置西京大和嶺屯田立烏撒烏

蒙等郡縣併會理泗川曰州爲二置維摩州丙子命李庭訓練各衛軍士賜晉王所部鈔四萬錠三月乙未寧國太平兩路旱以糧二萬石賑之夏四月丙午朔詔雲南行省釐革積弊壬子高郵府寶應縣民孫奕妻朱一產三男蠲復三年丙辰置五條河屯田丁巳免今年上都隆興絲銀大都差稅地租賜諸王也減干盜金印緬國遣使進白象戊午叅政張頤孫及其弟珪等伏誅于隆興市頤孫初爲新淦富人胡制機養子後制機自生子而死頤孫利其貲與珪謀殺之賂郡縣吏獲免其僕胡忠訴主之寃于官乃誅之

其貲悉還胡氏以中書省斷事官不蘭奚爲平章政
事賜皇姪海山所統諸王戍軍馬二萬二千九百餘
匹五月癸未左丞相荅剌罕遣使來言橫費不節府
庫漸虛詔自今諸位下事閑錢穀者毋輒入聞帝諭
集賢大學士阿魯渾撒里等曰集賢翰林乃養老之
地自今諸老滿秩者陞之勿令輒去或有去者罪將
及汝其諭中書知之增雲南至緬國十五驛驛給圓
符四驛券二十甲午太陰犯壘壁陣辛丑太白犯輿
鬼太陰犯昴復延慶司賜諸王也只里部鈔二萬錠
八憐脫列思所隸戶六萬五千餘錠是月同州平灤

隆興電揚州南陽順德東昌歸德濟寧徐濠芍陂旱
蝗真定保定大都通薊二州水六月己酉詔立緬國
王子窟麻刺哥撒八爲緬國王賜以銀印及金銀器
皿衣服等物丙辰以太傅月赤察而爲太師完澤爲
太傅皆賜之印丁巳太白犯填星御史中丞不忽木
卒貧無以葬賜鈔五百錠甲子置耽羅總管府詔各
省自今非奉命毋擅役軍以和林都元帥府兼行宣
慰司事吊吉而爪哇暹國蘇八等國二十二人來朝
賜衣遣之秋七月甲戌朔右丞相完澤請上徽仁裕
聖皇后謚寶冊乙酉緬國阿散哥也弟者蘇等九十

元史本紀卷第三
八
一人各奉方物來朝詔命餘人留安慶遣者蘇來上都辛卯熒惑犯井加乳母冀國夫人韓氏爲燕冀國順育夫人石抹氏爲冀國夫人杭州路貧民乏食以糧萬石減其直糶之八月癸卯朔更定蔭叙格正一品子爲正五從五品子爲從九中間正從以是爲差蒙古色目人特優一級置廣東鹽課提舉司癸丑太陰犯井庚申緬國阿散吉牙等昆弟赴闕自言殺主之罪罷征緬兵甲子辰星犯靈臺上星大名之白馬縣旱閏八月庚辰熒惑犯輿鬼庚子車駕還大都以中書右丞賀仁傑爲平章政事賜晉王所部糧七萬

石九月戊午太白犯斗壬戌太陰犯輿鬼曹州探馬赤軍與民訟地百二十頃詔別以鄰近官田如數給之廣東英德州達魯花赤脫歡察而招降群盜二千餘戶陞英德州爲路立三縣以脫歡察而爲達魯花赤兼萬戶以鎮之甲子太白犯斗改中御府爲中政院賜諸王出伯所部鈔萬五千四百餘錠建康常州江陵飢民八十四萬九千六十餘人給糧二十二萬九千三百九十餘石冬十月癸酉朔有事于太廟十一月壬寅朔詔頒寬令免上都大都隆興大德五年絲銀稅糧附近秣養馬馳之郡免稅糧十分之三其

餘免十分之一徒罪各減一半杖罪以下釋之江北
荒田許人耕種者元擬第三年收稅今並展限一年
著爲定例併遼陽省所轄狗站牛站爲一仍給鈔以
調其乏命省臺差官同昔寶赤鞠和林運糧稽遲未
至者真定路平棘縣旱十二月癸酉御史臺臣言所
糾官吏與有司同審所以事沮難行乞依舊制中書
凡有改作輒令監察御史同往非宜自今非奉旨勿
遣皆從之庚寅熒惑犯軒轅癸巳太陰犯房距星晉
州達魯花赤捏古伯給稱母喪歸迎其妻事聞詔以
其戮傷彛倫罷職不叙遣劉深合刺帶鄭祐將兵二
萬人征八百媳婦仍敕雲南省每軍十人給馬五匹
不足則補之以牛賜諸王忻都部鈔五萬錠兀魯思
不花等四部二十一萬九千餘錠西都守城軍二萬
八千餘錠賑建康平江浙東等處飢民糧二十二萬
九千三百餘石

五年春正月己酉太陰犯五車庚戌給征八百媳婦
軍鈔總計九萬二千餘錠壬子太陰犯輿鬼積尸氣
奉安昭睿順聖皇后御容于護國仁王寺罷檀景兩
州探金鐵冶提舉司以其事入都提舉司御史臺臣
言官吏犯賊及盜官錢事覺避罪逃匿者宜同獄成

雖經原免亦加降黜庶奸僞可革從之丙寅以兩淮
鹽法滯滯命轉運司官兩員分司上江以整治之仍
頒印及驛券辛酉太陰犯心二月己卯太陰犯輿鬼
以劉深合刺帶並爲中書右丞鄭祐爲叅知政事皆
佩虎符分雲南諸路行中書省事仍置理問官二員
郎中員外郎都事各一員給圓符四驛券二十罷福
建織綉提舉司增河間轉運司鹽爲二十八萬引罷
其所屬清滄深三鹽司丁亥立征八百媳婦萬戶府
二設萬戶四員發四川雲南囚徒從軍乙未詔廉訪
司官非親喪遷葬及以病給告者不得離職或以地

遠職卑受任不赴者臺憲勿復用丙申給脫脫等部
馬萬匹丁酉車駕幸上都詔飭雲南行中書省減內
外諸司官千五百一十四員增江浙戍兵戊戌賜昭
應宮興教寺地各百頃興教仍賜鈔萬五千錠上都
乾元寺地九十頃鈔皆如興教之數萬安寺地六百
頃鈔萬錠南寺地百二十頃鈔如萬安之數己亥凡
軍士殺人奸盜者令軍民官同鞠永寧路總管雄控
來朝獻馬三十餘匹賜幣帛有差三月甲辰收故軍
官金銀符戊申太陰犯御女己酉罷陝西路拘權課
稅所壬子賜諸王也孫等鈔一萬八千五百錠戊午

馬來忽等海島遣使來朝賜金素幣有差給和林貧
乏軍鈔二十萬錠諸王藥忽木而所部萬五千九百
餘錠丁卯熒惑犯填星己巳熒惑填星相合詔戒飭
中外官吏命遼陽行省平章沙藍將萬人駐夏山後
人備馬二匹官給其直夏四月壬申太陰犯東井癸
酉遣秃刺鐵木而等犒和林軍壬午以晉王甘麻刺
所部貧乏賜鈔四十萬錠調雲南軍征八百媳婦癸
巳禁和林釀酒其諸王駙馬許自釀飲不得沽賣是
月大都彰德廣平真定順德大名濮州蟲食桑五月
商州隕霜殺麥河南妖賊醜斯等伏誅己酉給月裏
可里軍駐夏山後者市馬鈔八萬八千七百餘錠辛
亥遣怯列亦帶脫脫帥師征四川癸丑太陰犯南斗
乙卯熒惑犯右執法丙辰曲靖等路宣慰使兼管軍
萬戶忽林失來朝壬戌雲南土官宋隆濟叛時劉深
將兵由順元入雲南雲南右丞月忽難調民供餽隆
濟因給其衆曰官軍徵發汝等將盡剪髮黥面爲兵
身死行陣妻子爲虜衆惑其言遂叛丙寅詔雲南行
省自願征八百媳婦者二千人人給貝子六十索丁
卯太白犯井六月乙亥平江等十有四路大水以糧
二十萬石隨各處特直賑糶開中慶路昆陽州海口

甲申歲星犯司恠丙戌宋隆濟率猫狢紫江諸蠻四
千人攻楊黃寨殺掠甚衆己酉緬王遣使獻馴象九
壬辰宋隆濟攻貴州知州張懷德戰死梁王遣雲南
行省平章撞兀兒叅政不蘭奚將兵禦之殺賊酋撒
月斬首五百級癸巳太白犯輿鬼歲星犯井甲午太
白犯輿鬼賜諸王念不烈妃札忽而真所部鈔二千
萬錠是月汴梁南陽衛輝大名濮州旱大都路水順
德懷孟蝗秋七月戊戌朔晝晦暴風起東北雨雹兼
發江湖泛溢東起通泰崇明西盡真州民被災死者
不可勝計以米八萬七千餘石賑之己亥增階沙二

州戍軍庚子籍安西王所侵占田站等四百餘戶爲
民賜寧遠王闊闊出所部鈔二萬三千餘錠乙巳遼
陽省大寧路以糧千石賑之丙午歲星犯井丁未
命御史大夫禿忽赤整飭臺事詔軍官受賊者與民
官同例量罪大小殿黜命監察御史審覆札魯忽赤
罪囚檢照蒙古翰林院案牘戊申立耽羅軍民萬戶
府諸王也滅干薨以其子八八刺嗣己酉詔諸司嚴
禁盜賊辛亥太陰犯壘壁陣賜諸王出伯等部鈔六
萬錠又給市馬直三十八萬四千錠癸丑詔禁畏吾
兒僧陰陽巫覡道人呪師自今有大祠禱必請而行

違者罪之浙西積雨泛溢大傷民田詔役民夫二千人疏導河道俾復其故命雲南省分蒙古射士征八百媳婦庚申辰星犯太白癸亥合丹之孫脫歡自北境來歸其父母妻子皆遭殺虜賜鈔一千四百錠給諸王妃札忽而真及諸王出伯軍鈔四十萬錠中書省臣言舊制京師州縣捕盜止從兵馬司有司不與遂致淹滯自今輕罪乞令有司決遣重者從宗正府聽斷庶不留獄且民不寃從之以暗伯阿忽台並知樞密院事禁富豪之家役軍詔封贈非中書省無輒奏請稱海至北境十二站大雪馬牛多死賜鈔一萬一千餘錠命御史臺檢照宣政院并僧司案牘陸太醫院爲二品以平章政事大都護提點太醫事脫因納爲太醫院使賜上都諸匠等鈔二十一萬七千四百錠大都保定河間濟寧大名水廣平真定蝗八月戊辰給軍人羊馬價及定遠王所部鈔十四萬三千錠己巳平灤路霖雨灤漆泚汝河溢民死者衆免其今年田租仍賑粟三萬石庚午禿刺鐵木而等自和林犒軍還言和林屯田宜令軍官廣其墾闢量給農具倉官宜任選人可革侵盜之弊從之甲戌遣薛超兀而等將兵征金齒諸國時征緬師還爲金齒所遮士

元史本紀卷第...
多戰死又接連八百媳婦諸蠻相效不輸稅賦賊殺
官吏故皆征之庚辰詔遣官分道賑恤凡獄囚禁繫
累年疑不能決者令廉訪司具其疑狀申呈省臺詳
讞仍爲定例各路被災重者免其差稅一年貧乏之
家計口賑恤尤甚者優給之小吏犯贓者並罷不叙
征緬萬戶曳刺福山等進馴象六壬辰太陰犯軒轅
御女乙未填星犯太微上將順德路水免其田租九
月癸丑放稱海守倉庫軍還令以次更代丙辰江陵
常德澧州皆旱並免其門攤酒醋課乙酉自八月庚
辰葦出井歷紫微垣至天市垣凡四十六日而滅冬

十月丙辰朔以畿內歲饑增明年海運糧爲百二十
萬石己巳緬王遣使入貢戊寅雲南武定路土官群
則獻方物癸未太陰犯東井壬午車駕還大都丙戌
以歲饑禁釀酒弛山澤之禁聽民捕獵湖廣行省臣
言海南海北道宣慰司都元帥府不與軍務遇有盜
竊惟行文移比廻已不及事今乞以其長二人領軍
務又鎮守官慢功當罰者已有定例獲功當賞者乞
或加散官或授金銀符皆從之撥南陽府屯田地給
新籍畏吾而戶俾耕以自贍仍給糧三月丁亥詔軍
官旣受命而不時赴者病故不行者被差事畢不即

還者准民官例違限六月選人代之被代者期年始
叙改鄂州路爲武昌路遣使就調雲南四川福建廣
東廣西官諭百司凡事關中書省者毋得輒奏權豪
勢要之家佃戶貸糧者聽於來歲秋成還之癸巳分
調門黎雅軍戍蠻夷命陝西屯田萬戶也不干等將
之辛卯夜有流星大如杯光燭地自北起近東分爲
二星沒於危宿十一月己亥歲星犯東井詔諭中書
近因禁酒聞年老需酒之人有預市而儲之者其無
釀具者勿問罷湖南轉運司弘州種田提舉司以其
事入有司降容象橫霄路爲州平灤金丹提舉司爲
管勾陞昭州爲平樂府省泌縣入唐州丁未遣劉國
傑及也先忽都魯將兵萬人八刺及阿塔赤將兵五
千人征宋隆濟減直糶米賑京師貧民設肆三十六
所其老幼單弱不能自存者廩給五月選六御扈從
漢軍習武事仍禁萬戶以下毋令私代犯者斷罪有
差戊申太陰犯昴彗人藍賴率丹陽三十六洞來降
以賴等爲融州懷遠縣簿尉立長信寺秩三品十二
月甲戌歲星犯司怪給安西王所部軍士食令各還
其家候春調遣辛卯太陰犯南斗征東行省平章闊
里吉思以不能和輯高麗能定強竊盜條格凡盜人

孳畜者取一償九然後杖之是歲汴梁歸德南陽鄧州唐州陳州和州襄陽汝寧高郵揚州常州蝗峽州隨州安陵荆門秦州光州揚州滁州高郵安豐霖汴梁之封丘武陽蘭陽中牟延津河南澠池蘄州之蘄春廣濟蘄水旱大名宣德奉聖歸德寧海濟寧般陽登州萊州益都濰州博興東平濟南濱州保定河間真定大寧水是歲斲大辟六十一人

六年春正月癸卯詔千戶百戶等自軍逃歸先事而逃者罪死敗而後逃者杖而罷之没入其男女乙巳中書省臣言廣東宣慰副使脫歡察而收捕盜賊屢

有勞績近廉訪司劾其私置兵仗擅殺土寇等事遣官鞠問實無私罪乞加獎諭命賜衣二襲晉王甘麻刺薨命封其王印及內史府印丙午京畿二十一站闕食賜鈔萬二千七百餘錠陝西旱禁民釀酒以雲南站戶貧乏增馬及鈔以優恤之中書省臣以朱清張瑄屢致人言乞罷其職徙其諸子官江南者于京丁未命江浙平章阿里專領其省財賦庚戌詔官吏犯罪已經赦宥者仍從覈問海道漕運船令探馬赤軍與江南水手相豪教習以防海寇江南僧石祖進告朱清張瑄不法十事命御史臺詰問之帝語臺臣

元史本紀卷二十一
十七
曰朕聞江南富戶侵占民田以致貧者流離轉徙卿等嘗聞之否臺臣言曰富民多乞護持璽書依倚以欺貧民官府不能詰治宜悉追收爲使命即行之毋越三日詔自今僧官僧人犯罪御史臺與內外宣政院同鞠宣政院官徇情不公者聽御史臺治之增諸王塔赤鐵木而歲賜銀二百五十兩雜幣百匹乙卯築渾河堤長八十里仍禁豪家毋侵舊河令屯田軍及民耕種增劉國傑等軍仍令屯戍險隘俟秋進師命札忽而帶阿里等整治江南影占稅民地土者中書省臣言御史臺廉訪司體察體覆前後不同初立

臺時止從體察後立按察司事無大小一皆體覆由是憲司之事積不能行請自今除水旱災傷體覆餘依舊例體察爲宜從之以大都平灤等路去年被水其軍應赴上都駐夏者免其調遣一年詔軍官除邊遠出征其餘遇祖父母父母喪依民官例立限奔赴禁畜養鷹犬馬駝等人擾民乙未以諸王眞童誣告濟南王謫置劉國傑軍中自效壬戌鎮星犯太微垣上將二月庚午太陰犯昴謫諸王孛羅於四川八剌軍中自效癸酉增諸王出伯軍三千人人備馬二匹官給其直丙戌遣陝西省平章也速帶而叅政汪惟

勤將川陝軍湖廣平章劉國傑將湖廣軍征亦乞不
薛一切軍務並聽也速帶而劉國傑節制罷征八百媳
婦右丞劉深等官收其符印驛券以京師民乏食命
省臺委官計口驗實以鈔十一萬七千一百餘錠賑
之癸巳帝有疾釋京師重囚三十八人三月丁酉以
旱溢爲災詔赦天下大都平灤被災尤甚免其差稅
三年其餘災傷之地已經賑恤者免一年今年內郡
包銀俸鈔江淮已南夏稅諸路鄉村人戶散辦門攤
課程並蠲免之壬寅太陰犯輿鬼命僧設水陸大會
七晝夜癸卯歲星犯井甲寅太陰犯鉤鈴合祭昊天

上帝皇地祇于南郊遣中書左丞相荅剌罕哈刺哈
孫攝事夏四月乙丑朔太白犯東井丁卯詔曲赦雲
南諸部蠻夷發通州倉粟三百石賑貧民釋輕重囚
三十八人人給鈔五錠乙亥濬永清縣南河戊寅太
陰犯心庚辰上都大水民飢減價糶糧萬石賑之戊
子脩盧溝上流石徑山河隄釋重囚車駕幸上都庚
寅太白犯輿鬼真定大名河間等路蝗五月乙巳給
貧乏漢軍地及五丁者一頃四丁者二頃三丁者三
頃其孤寡者存恤六年逃散者招諭復業戊申太廟
寢殿災癸丑謫和林潰軍征雲南其戰傷而歸及嘗

奉晉王令旨諸工藥忽木而免者不遣丁巳福州路
饑賑以糧一萬四千七百石濟南路大水揚州淮安
路蝗歸德徐州邳州水六月癸亥朔日有食之太史
院失於推筭詔中書議罪以聞填星犯太微西垣上
將甲子建文宣王廟於京師辛未享于太廟乙亥太
陰犯斗安南國以馴象二及朱砂來獻甲申賜諸王
合荅孫脫歡脫列鐵木而伯牙倫完者所部鈔四萬
五千八百餘錠湖州嘉興杭州廣德饒州太平婺州
慶元紹興寧國等路饑賑糧二十五萬一千餘石大
同路寧海州亦饑以糧一萬六千石賑之廣平路大

水秋七月癸巳朔熒惑鎮星辰星聚井庚子太陰犯
心己酉亦乞不薛土官三人棄家來歸賜金銀符衣
服戊午太陰犯熒惑辛酉賜諸王八八刺脫脫灰也
只里也減干等鈔四萬三千九百餘錠以江浙行省
叅知政事忽都不丁爲中書右丞建康民饑以米二
萬石賑之大都諸縣及鎮江安豐濠州蝗順德水八
月甲子詔御史臺凡有司婚姻土田文案遇赦依例
檢覆乙丑熒惑犯歲星己巳熒惑犯輿鬼辛巳太陰
犯昴壬午太白犯軒轅九月乙未遣阿牙赤撒罕禿
會計稱海屯田歲入之數仍自今令宣慰司官與阿

刺台共掌之甲午賜諸王兀魯思不花所部鈔六萬
錠丙午熒惑犯軒轅丁未中書省臣言羅里等擾民
宜依例決遣置屯田所從之賜諸王八撒而等鈔八
萬六千三百餘錠已酉龍興民譌言括童男女至有
殺其子者命誅其爲首者三人癸丑太陰犯輿鬼丁
巳太白犯右執法賜諸王捏苦迭而等鈔五千八百
四十錠冬十月甲子改浙東宣慰司爲宣慰司都元
帥府徙治慶元鎮過海道置大同路黃花嶺屯田罷
軍儲所立屯儲軍民總管萬戶府設官六員仍以軍
儲所宣慰使法忽魯丁掌之南人林都鄰告浙西廉
訪使張珪收藏禁書及推筭帝五行江浙運使合只
亦言珪沮撓鹽法命省臺官同鞠之丙子車駕還大
都壬午熒惑犯太微西垣上將濟南濱隸泰安高唐
州霖雨米價騰湧民多流移發粟賑之併給鈔三萬
錠十一月辛卯填星犯左執法甲午劉國傑裨將宋
光率兵大敗蛇節賜衣二襲仍授以金符乙未辰星
犯房癸卯太陰犯昴己酉太陰犯軒轅庚戌禁和林
軍釀酒惟安西王阿難答諸王忽刺出脫脫不沙也
只里駙馬蠻子台弘吉列帶燕里干許釀辛亥以同
知樞密院事合答知樞密院事詔江南寺觀凡續置

民田及民以施入爲名者並輸租充役戊午籍河西
寧夏善射軍隸親王阿木哥甘州軍隸諸王出伯己
未詔諸驛使輒枉道者罪之十二月庚申朔熒惑犯
填星辛酉御史臺臣言自大德元年以來數有星變
及風水之災民間乏食陛下敬天愛民之心無所不
盡理宜轉災爲福而今春霜殺麥秋兩傷稼五月太
廟災尤古今重事臣等思之得非荷陛下重任者不
能奉行聖意以致如此若不更新後難爲力乞令中
書省與老臣識達治體者共圖之復請禁諸路釀酒
減免差稅賑濟飢民帝皆嘉納命中書即議行之雲

南地震戊辰又震甲子衡州袁舜一等誘集二千餘
人侵掠郴州湖南宣慰司發兵討之獲舜一及其餘
黨命誅其首謀者三人餘者配洪澤芍陂屯田其脅
從者招諭復業乙丑歲星犯輿鬼乙亥大陰犯輿鬼
丙子劉國傑也先忽都魯來獻蛇節羅鬼等捷庚辰
熒惑犯太微東垣上相命中書省更定略賣良人罪
例癸未太陰犯房保定等路饑以鈔萬錠賑之是歲
斷大辟三人

本紀卷第二十一

本紀卷第二十一

元史二十一

翰林學士昂大知制誥兼修國史宋濂翰林待制承直郎同知制誥兼國史院編修官臣王禕等奉勅修

成宗四

七年春正月戊戌太陰犯昴甲辰太陰犯軒轅丙午定諸改補鈔罪例為首者杖一百有七從者減二等再犯從者杖與首同為首者流己酉以歲不登禁河北甘肅陝西等郡釀酒益都諸處牧馬之地為民所墾者畝輸租一斗太重減為四升弛饑荒所在山澤河泊之禁一年賑那海貧乏戶米八千石壬子罷歸

德府括田己卯詔凡爲匿名書辭語重者誅之輕者
流配首告人賞鈔有差皆籍沒其妻子充賞命御史
臺宗正府委官遣發朱清張瑄妻子來京師仍封籍
其家貲拘收其軍器海舶等丁巳令樞密院選軍士
習農業者十人教軍前屯田賜也梯忽而的合金五
十兩銀千兩鈔千定幣帛百匹二月壬戌詔中書省
汰諸有司冗員仍令諭樞密院除出征將帥外掌署
院事者定其員數以聞辛未以平章政事行上都留
守木八剌沙陝西行省平章阿老瓦丁並爲中書平
章政事江南行臺御史中丞尚文爲中書左丞江浙
行省參知政事董士珍爲中書參知政事壬申詔樞
密院宗正府等自今每事與中書共議然後奏聞諸
司不得擅奏遷調官員雖經特旨用之而於例未允
者亦聽覆奏甲戌減杭州稅課提舉司冗員丙子詔
和林軍以六年更戌仍給鈔以周其乏命西京也速
迭而軍及大都所起軍皆以四月至上都五月赴北
丁丑命諸王出伯非急務者勿遣乘驛詔中書省設
官自左右丞相以下平章二員左右丞各一員參知
政事二員定爲八府戊寅太陰犯心己卯盡除內郡
饑荒所在差稅仍令河南省賑恤流民給北師鈔三

十八萬錠以安南陳益稷久居鄂州賜鈔千錠以侍御史朶台爲中書參知政事御史臺臣言江浙行省平章阿里左丞高翥安祐僉省張祐等詭名買鹽萬五千引增價轉市於人乞遣省臺官按問從之太原大同平灤路饑並減直糶糧以賑之庚辰命陝西甘肅行省賑鳳翔秦鞏甘州合迷里貧乏戶監察御史杜肯構等言太傅右丞相完澤受朱清張瑄賄賂事不報壬午帝語中書省臣曰比有以歲課增羨希求爵賞者此非培植於民何從而出自今除元額外勿以增羨作正數罷江南財賦總管府及提舉司禁內外

中書省戶部轉運司官不得私買鹽引罷致用院禁諸人毋以金銀絲線等物下番罷江南都水庸田司行通政院併大都鹽運司入河間運司其所掌京師酒稅課令戶部領之禁諸人非奉旨毋得以寶貨進獻汰諸色人冒充宿衛及諸王駙馬妃主部屬濫請錢糧者真定路饑賑鈔五萬錠仍諭諸王小薛及鷹師等毋於真定近地縱獵擾民丙戌詔除征邊軍士及兩都站戶外其餘人戶均當徭役丁亥詔自今除樞密院御史臺宣政院依舊奏選諸司毋得擅奏其舉用人負並經中書省三月己丑朔保定路饑賑鈔四

萬錠庚寅詔遣奉使宣撫循行諸道以郝天挺塔出
往江南江北石珪往燕南山東耶律希逸劉賡往河
東陝西鐵里脫歡戎益往兩浙江東趙仁榮岳叔謨
往江南湖廣木八剌陳英往江西福建塔赤海牙劉
敏中往山北遼東並給二品銀印仍降詔戒飭之江浙
行省平章脫脫遣發朱清張瑄家屬其家以金珠重
賂之脫脫以聞帝諭之曰朕以江南任鄉果能爾真
男子事也其益恪勤乃事賜以黃金五十兩都城火
命中書省與樞密院議增巡防兵甘肅行省供軍錢
糧多弊詔徙廉訪司于甘州壬辰定大都南北兵馬
司姦盜等罪六十七以下付本路七十七以上付也
可札魯忽赤河間路禾稼不登命罷修建僧寺工役
乙未真定路饑賑鈔六百六十餘錠中書平章伯顏
梁德珪段真阿里渾撒里右丞八都馬辛左丞月古
不花參政迷而火者張斯立等受朱清張瑄賄賂治
罪有差詔皆罷之以洪君祥爲中書右丞監察御史
言其曩居宥密以貪賄罷黜乞別選賢能代之不報
甲辰詔定贓罪爲十二章京朝官月俸外增給祿米
外任官無公田者亦量給之乙巳以征八百媳婦喪
師誅劉深笞合刺帶鄭祐罷雲南征緬分省戊申小

蘭禧岳鉉等進大一統志賜賚有差己酉追收元降
除免和雇和市璽書以脫歡誣告諸王脫脫謫置湖
廣省軍前自效罷甘肅行省差調民兵及取勘軍民
站戶家屬孳畜之數庚戌以鐵哥察而所收愛牙合
赤戶仍隸諸王脫脫癸丑樞密院臣及監察御史言
中丞董士選貸朱清張瑄鈔非義帝曰臺臣稱貸不
必問也若言者不已後當杖之甲寅車駕幸上都丙
辰賜諸王小薛所部等鈔六萬錠賑李陵臺等五站
戶鈔一千四百餘錠遼陽等路饑賑鈔萬錠夏四月
癸亥太陰犯東井詔省臺樞密院通政院凡呼刀斧

都總管府官吏必用印帖其餘諸司不得輒召徵藩
臣陳天祥張孔孫郭筠至京師以天祥孔孫爲集賢
大學士筠爲昭文館大學士皆同議中書省事丙寅
太陰犯軒轅庚午以中書文移八繁其二品諸司當
呈省者命止關六部中書左丞相荅刺罕言僧人修
佛事畢必釋重囚有殺人及妻妾殺夫者皆指名釋
之生者苟免死者負冤於福何月帝嘉納之辛未流
朱清張瑄子孫于遠方仍給行賈乙亥歲星犯輿鬼
太陰犯南斗庚辰蛇節降令海剌孫將兵五千守之
餘衆悉遣還各戍撥礮門四川軍人一千人鎮羅羅

元史本紀卷二十一
斯其土軍修治道路者悉令放還甲申熒惑犯太微垣右執法丁亥歲星犯輿鬼誅蛇節衛輝路辰州鎮濟南路隕霜殺麥五月己丑給和林軍鈔三十八萬錠開上都大都酒禁其所隸兩都州縣及山後河東山西河南嘗告饑者仍悉禁之詔雲南行省整飭錢糧壬辰辰星犯東井以大德五年戰功賞北師銀二十萬兩鈔二十萬錠幣帛各五萬九千匹賜皇姪海山及安西王阿難荅諸王脫脫八不沙駙馬蠻子台等各金五十兩銀珠錦幣等物有差丙申遣征緬甸軍萬四千人還各戍祭卯詔和林軍糧除歲支十二

萬石其餘非奉旨不得擅支丁未床兀兒來朝以戰功賜金五十兩銀四百兩仍給其萬戶所隸貧乏軍鈔六十九萬餘錠辛亥奉使宣撫耶律希逸劉賡言平陽僧察力威犯法非一有司憚其豪強不敢詰問聞臣等至潛逃京師中書省臣言宜捕送其所令省臺宣政院遣官雜治從之甲寅濬上都灤河乙卯以昌童王五戶絲分給諸王塔失鐵木而令甘州站戶爲僧人秃魯花等隱藏者依例還役詔中外官吏無職田者驗俸給米有差其上都甘肅和林諸處非產米地惟給其價禁諸王八不沙部於般陽等處圍獵擾

民詔諸宿衛士除官負子弟曾經奏准者留餘悉革去禁諸王駙馬母輒杖州縣官吏違者罪王府官立和林宣慰司都元帥府以忽刺出遥授中書省左丞爲宣慰使都元帥賜諸王納忽里鈔千錠幣三十匹濟寧東昌濟南般陽益都蟲食麥太原龍興南康袁瑞撫等路高唐南豐等州饑減直糶糧五萬五千石東平益都濟南等路蝗般陽路隕霜閏五月戊午朔日有食之以也奴鐵木而闊闊出晃兀沒於軍賜其家鈔有差壬戌詔禁犯曲阜林廟者丁卯平江等十五路民饑減直糶糧三十五萬四千石戊辰太陰犯心己巳以諸王孛羅真重皆討賊有功徵詣京師完澤薨庚辰雲南行省平章也速帶而入朝以所獲軍中金五百兩爲獻帝曰是金卿効死所獲者賜鈔千錠丁丑禁諸王駙馬等征北諸軍以奴爲代者罪之辛巳詔僧人與民均當差役癸未各道奉使宣撫言去歲被災人戶未經賑濟者宜免其差役從之命江浙行省右丞董士選發所籍朱清張瑄貨財赴京師其海外未還商舶至則依例籍沒甘肅行省平章合散等侵盜官錢十六萬三千餘錠鹽引五千餘道命省臺官徵之詔上都路應昌府亦乞列思和林等處

依內郡禁酒丙戌罷管田提舉司汴梁開封縣蟲食
麥六月己丑御史臺臣言瓜沙二州自昔爲邊鎮重
地今大軍屯駐甘州使官民反居邊外非宜乞以蒙
古軍萬人分鎮險隘立屯田以供軍實爲便從之罷
四川宣慰司立四川行中書省以雲南行省平章脫
脫湖廣行省議事平章程鵬飛並爲平章政事壬辰
武岡路饑減價糶糧萬石以賑之給欽察千戶等貧
乏者鈔三萬七千八百餘錠癸巳叛賊雄控來降乙
未以亦乞不薛就平留探馬赤軍二千人討阿永叛
蠻餘悉放還庚子丙京道宣慰使法忽魯丁以瑟瑟

二千五百餘斤鬻于官爲鈔一萬一千九百餘錠有
旨除御榻所用外餘未用者宜悉還之命阿伯阿忽
台等整飭河西軍事癸卯詔九軍官子弟年及二十
者與民官子孫同俸直一年方許襲職萬戶於樞密
院千戶於行省百戶於本萬戶乙巳罷行省僉省浙
西淫雨民饑者十四萬賑糧一月仍免今年夏稅并
各戶酒醋課命甘肅行省修阿合潭曲尤壕以通漕
運大寧路蝗秋七月辛酉常德路饑減直糶糧萬石
以賑之壬戌御史臺臣言前河間路達魯花赤忽賽
因轉運使木甲德壽皆坐贓罷今忽賽因以獻鷹犬

復除大寧路達魯花赤木甲德壽以迭里迷失妄奏
 其被誣復除福寧知州並宜改正不叙以戢姦貪從
 之禁僧人以修建寺宇為名賫諸王令旨乘傳擾民
 汰宿衛士丙寅各刺罕哈刺孫為中書右丞相知
 樞密院事戊寅歲星犯軒轅丙子給四川行省驛券
 十二道詔除集賢翰林老臣預議朝政其餘三品以
 下年七十者各陞散官一等致仕立和林兵馬司罷
 遼東宣慰司丁丑中省臣言大同稅課比奉旨賜乳
 母楊氏其家倍歛過數擾民為甚勅賜鈔五百錠其
 稅課依例輸官御史臺臣言湖南輸糧百石者出驛

馬一疋廣海地狹所輸不及百石者所出亦如之故
 官以鹽引助其不給每馬一疋貴州以北給鹽十七
 引以南二十引近立權鹽提舉司官價增五之三元
 給二十引者宜與鈔十七錠十七引者十五錠從之
 罷江南白雲宗攝所其田令依例輸租都哇察八而
 減里鐵木而等遣使請息兵帝命安西王慎飭軍士
 安置驛傳以俟其來戊寅賜諸王奴倫伯顏也不干
 等鈔九萬錠罷諸王所設總管府叛賊麻你降貢金
 五百兩童男女二百人及馬牛羊却之己卯太陰犯
 井乙酉熒惑犯房賜諸王曲而魯等部鈔幣有差八

月己丑罷護國仁王寺元設江南營田提舉司給安
西王所部貧民米二萬石辛卯夜地震平陽太原尤
甚村堡移徙地裂成渠人民壓死不可勝計遣使分
道賑濟爲鈔九萬六千五百餘錠仍免太原平陽今
年差稅山場河泊聽民採捕癸巳太白犯氏月里不
花將甕吉里軍赴雲南道卒以其子普而耶代之甲
午熒惑犯東咸太陰犯牽牛庚子中書省臣言法忽
魯丁輸運和林軍糧其負欠計二十五萬餘石近監
察御史亦言其侵匿官錢十三萬餘錠臣等議遣官
徵之不足則籍沒其財產從之乙巳歲星犯軒轅庚
戌緬王遣使獻馴象四辛亥熒惑犯天江賜諸王脫
鐵木而之子也先博怯所部等鈔六千九百餘錠九
月戊午車駕還大都丙寅太白晝見以太原平陽地
震禁諸王阿只言小薛所部擾民仍減太原歲飼馬
之半遣刑部尚書塔察而翰林直學士王約使高麗
以其國相吳祈專權徵詣闕問罪辛未熒惑犯南斗
詔諭諸司賑恤平陽太原甲戌太陰犯東井乙亥太
白犯南斗丙子罷僧官有妻者壬午辰星犯氏復木
八刺沙平章政事冬十月丁亥太白經天御史臺臣
劾言江浙行省平章阿里不法帝曰阿里朕所信任

臺臣屢以爲言非所以勸大臣也後有言者朕當不怒
戊子弛太原平陽酒禁以江浙年穀不登減海運糧
四十萬石己丑詔從軍醫工止復其妻子戶如故辛
卯復立陝西行御史臺癸巳御史臺臣及諸道奉使
言行省官久任與所隸編氓聯姻害政詔互遷之以
只而合忽知樞密院事給大都文宣三廟洒掃戶五乙
未發雲南叛寇餘黨未革心者來京師留蛇節養子
阿闕于本境以撫其民改平灤爲永平路陞甘州爲
上路設刑部獄吏一員以掌囚徒安西轉運司於常
課外增筭五萬七千四百錠人賜衣一襲以勸其功

詔諸司凡錢糧不經中書省議者勿奏庚子改普定
府爲路隸曲靖宣慰司以故知府容苴妻適姑爲總
管佩虎符以叙州宣慰司爲叙南等處諸部蠻夷宣
撫司辛丑太陰犯東井庚戌翰林國史院進太祖太
宗定宗睿宗憲宗五朝實錄辛亥詔軍戶貧乏者存
恤六年增蒙古國子生百員十一月甲寅朔賜諸王
阿只吉所部鈔二十萬錠糧萬石命鷹師圍獵毋得
擾民以順元隸湖廣省併海道運糧萬戶府爲海道
都漕運萬戶府給印二亦乞不薛賊黨魏傑等降人
賜衣一襲遣還俾招其首亂者丁巳詔大同靜州隆

興等路運糧五萬石入和林己未太白經天辛酉木
冰甲子命依十二章斷僧官罪丙寅鎮星犯進賢戊
辰太陰犯井辛未陞全寧府為路己卯太陰犯東咸
遣諸王滅怯禿玉龍鐵木而使察八而十二月甲申
朔詔內郡比歲不登其民已免差者併蠲免其田租
乙酉弛京師酒課許貧民釀酒丙戌太白經天熒惑
犯壘壁陣戊子以平宋隆濟功增諸將秩賜銀鈔等
物有差其軍士各賜鈔十錠放歸存恤一年丙申大
陰犯東井辛丑太陰犯明堂詔撫諭順元諸司免大
德七年民間逋稅命江南浙西官田奉特旨賜賚者
許中書省迴奏賜皇姑魯國大長公主鈔一萬五千
錠幣帛各三百匹加封真武為元聖仁威玄天上帝
丁未太陰犯天江以轉輸軍餉勞免思播二州及潭
衡辰沅等路稅糧一年常澧三分之一淘金站戶無
種佃者免雜役一年七道奉使宣撫所罷贓污官吏
凡一萬八千四百七十三人贓四萬五千八百六十
五錠審冤獄五千一百七十六事是歲斷大辟十人
八年春正月己未以災異故詔天下恤民隱省刑罰
雜犯之罪當杖者減輕當笞者並免私鹽徒役者減
一年平陽太原免差稅三年隆興延安及上都大同

懷孟衛輝彰德真定河南安西等路被灾人戶免二
年大都保定河間路免一年江南佃戶私租大重以
十分為率減二分永為定例仍弛山場河泊之禁聽
民採捕庚申以雲南順元同知宣撫事宋阿重生獲
其叔隆濟來獻特陞其官賜衣一襲置掌薪司以供
尚食令宣徽院掌其事癸亥禁錮朱清張瑄族屬乙
丑復置遂平新蔡真陽太和沈丘潁上柘城城父邾
舞陽十縣丙寅以御史中丞大僕卿塔思不花為中
書右丞江南行臺中丞趙仁榮為中書參知政事陞
教坊司三品庚午以輦真監藏為帝師辛巳詔諸王
妃主及諸路有馬者十取其一諸王駙馬往遼東捕
海東鶻者毋給驛自榮澤至睢州築河防十有八所
給其夫鈔人十貫駙馬也列于住所部民饑以糧二
千石賑之是月平陽地震不止已修民屋復壞二月
丙戌增置國子生二百員選宿衛大臣子孫充之降
荏浪路為州併隴干縣入德順州辛卯命諸王出伯
所部軍屯田于薛出合出谷甲午詔父子兄弟有才
者許並居風憲徙江東建康道廉訪司治于寧國其
建康路簿書命監察御史鈞考丙申分軍千人戍嘉
定州甲辰翰林學士承旨撒里蠻進金書世祖實錄

節文一。冊漢字實錄八十冊減宿衛繁冗者丙午車
駕幸上都勅軍人奸盜詐僞悉歸有司賜太祖位怯
憐口戶鈔萬八千二百錠布帛萬匹賜禿赤及塔刺
海以所籍朱清張瑄田人六十頃近侍鷹坊怯憐口
鈔二萬七千三百錠布帛萬二千匹賜平章政事王
慶端玉帶半俸終身三月丁巳詔軍民官已除以地
遠官卑不赴者奪其官不叙軍官擅離所部者悉遣
還翼違者論如律軍人不告所部私歸者杖而還之
乙丑去歲十二月庚戌彗星見約盈尺在室十一度
入紫微垣至是滅凡七十四日戊辰中書左丞尚文

以疾辭不允詔諸王駙馬所分郡邑達魯花赤惟用
蒙古人三年依例遷代其漢人女直契丹名爲蒙古
者皆罷之勅軍民逃奴有獲者即付其主主在他所
者赴所在官司給之仍追逃奴鈔充獲者賞逃及誘
匿者論罪有差詔諸路牧羊及百至三十者官取其
一不及數者勿取中書省臣言自內降旨除官者果
爲近侍宿衛踐履年深依已除叙嘗宿衛未官者視
散官叙始歷一考準爲初階無資濫進降官二級官
高者量降各位下再任者從所隸用三任之上聽入
常調蒙古人不在此限從之雲南黎州盜劫也速而

元亨本紀卷二十一
帶家屬貲產命宣政院督其郡邑捕之給諸王出伯所部馬萬三千五百疋庚辰詔內外使以軍務行者至其地有司給饋十五日自餘重事八日細事三日命凡爲衙兵者皆半隸屯田仍諭各衛屯官及屯田者視其勤墮以爲賞罰陞分寧縣爲寧州罷廬州路權茶提舉司灤城濟陽等縣隕霜殺桑夏四月丙戌置千戶所戍定海以防歲至倭船永寧路叛寇雄控來降命僧道爲商者輸稅凡諸王駙馬徵索有司非奉旨輒給者罪且罷之詔諸路畏吾兒合迷里自相訟者歸都護府與民交訟者聽有司專決甲午詔朝

廷諸王駙馬進捕鷹鷄皆有定戶自今非鷹師而乘傳冒進者罪之庚子以永平清滄柳林屯田被水其逋租及民貸食者皆勿徵丁未分教國子生於上都賜西平王奧魯赤合帶等部民鈔萬錠朶耳思等站戶鈔二千二百錠銀三百九十兩有奇益都臨朐德州齊河蝗五月癸未朔日有食之辛酉以所籍朱清張瑄江南財產隸中政院己巳以平宋隆濟功賜諸王脫脫亦吉里平章床兀而等銀鈔金幣玉帶及大理金齒曲靖烏撒烏蒙宣慰等官銀鈔各有差壬申罷福建都轉運鹽使司以其歲課併隸宣慰司中書

省臣言吳江松江實海口故道潮水久淤凡湮塞良田百有餘里况海運亦由是而出宜於租戶役萬五千人濬治歲免租人十五石仍設行都水監以董其程從之追收諸王驛券癸酉定館陶等十七倉官品級諸糧十萬石以上者從七品五萬石以上者正八品不及五萬者從八品庚辰以去歲平陽太原地震宮觀摧圮者千四百餘區道士死傷者千餘人命賑恤之是月蔚州之靈仙太原之陽曲隆興之天城懷安大同之白登大風雨雹傷稼人有死者大名之濬滑德州之齊河霖雨汴梁之祥符大康衛輝之獲嘉

太原之陽武河溢六月癸未開和林酒禁立酒課提舉司丁酉汝寧妖人李曹驢等妄言得天書惑衆事覺伏誅益津蝗汴梁祥符開封陳州霖雨蠲其田租扶風岐山寶鷄諸縣旱烏撒烏蒙益州忙部東川等路饑疫並賑恤之秋七月辛酉罷江淮等處財賦總管府癸亥諸王合贊自西域遣使來貢珍物賜諸王也孫鐵木而等鈔二十萬錠戍北千戶十五萬錠怯憐口等九萬餘錠西平王奧魯赤二萬錠以順德恩州去歲霖雨免其民租四千餘石八月太原之交城陽曲管州嵐州大同之懷仁雨雹隕霜殺禾杭州火

發粟賑之以大名高唐去歲霖雨免其田租二萬四千餘石九月癸丑車駕至自上都庚申伯顏梁德珪並復爲中書平章政事八都馬辛復爲中書右丞迷而火者復爲中書參知政事以江浙行省平章阿里爲中書平章政事庚午以戶部尚書張祐爲中書參知政事癸酉諸王察八而朶瓦等遣使來附以幣帛六百匹給之詔諸王凡泉府規營錢非奉旨毋輒支貸給諸王出伯所部帛四百匹四川雲南鎮戍軍家居太原平陽被災者給鈔有差潮州颶風起海溢漂民廬舍溺死者衆給其被災戶糧兩月以翼孟輝雲

內諸州去歲霖雨免其田租二萬二千一百石冬十月辛卯有事于太廟辛巳給諸王阿只吉所部馬料價鈔三千九百錠以宣徽使大都護長壽爲中書右丞陝西行省右丞脫歡爲中書參知政事丁亥安南遣使入貢詔諸王駙馬毋乘驛以獵庚寅封皇姪海山爲懷寧王賜金印仍割瑞州戶六萬五千隸之歲給五戶絲直鈔二千六百錠幣帛各千匹戊戌命省臺院官鞠高麗國相吳祈及千戶石天輔等以祈離間王父子天輔謀歸日本皆笞之徙安西十一月壬子詔內郡江南人凡爲盜黥三次者謫戍遼陽諸色

元史本紀卷二十一
人及高麗三次免黥謫戍湖廣盜禁籟馬者初犯謫
戍再犯者死以平陽太原去歲地大震免其稅課一
年遣制用院使忽鄰翰林直學士林元撫慰高麗放
遼陽民樂亦等三百九十戶爲兵者還民籍丁卯復
免僧人租戍辰以武備卿鐵古迭而爲御史大夫壬
申詔凡僧姦盜殺人者聽有司專決寧遠王闊闊出
以馬萬五百餘疋給軍命以鈔五萬二千五百餘錠
償其直增海漕米爲百七十萬石十二月庚子復立
益都淘金總管府辛丑封諸王出伯爲威武西寧王
賜金印賜安西王阿難荅諸王阿只吉也速不干等

鈔一萬四千錠

九年春正月丁巳太陰犯天關戊午帝師輦真監藏
卒賻金五百兩銀千兩幣帛萬匹鈔三千錠仍建塔
寺甲子太陰犯明堂以兗吉刺部民張道奴等舊權
爲軍者復隸民籍己巳大陰犯東咸壬申弛大都酒
禁甲戌賜諸王完澤撒都失里別不花等所部鈔五
萬六千九百錠幣帛有差鷹師等百五十萬錠二月
癸未勅軍匠等戶元隸東宮者有司毋得奪之中書
省臣言近侍自內傳旨凡除授賞罰皆無文記懼有
差違乞自今傳旨者悉以文記付中書從之甲午免

天下道士賦稅乙未建大天壽萬寧寺丁酉封諸王
完澤爲衛安王定遠王岳木忽而爲威定王並賜金
印陞翰林國史院爲正二品賜朶瓦使者幣帛五百
匹庚子命中書議行郊祀禮辛丑詔赦天下令御史
臺翰林集賢院六部於五品以上各舉廉能識治體
者三人行省行臺宣慰司廉訪司各舉五人免大都
上都隆興差稅內郡包銀俸鈔一年江淮以南租稅
及佃種官田者均免十分之二致仕官止有一子應
承廕者其僕使並免之家貧者給半俸終其身丙午
賜宿衛怯憐口鈔一百萬錠以歸德頻歲被水民饑

給糧兩月平陽太原地震站戶被災給鈔一萬二千
五百錠三月丁未朔車駕幸上都給還安西王積年
所減歲賜金五百兩絲一萬一千九百斤仍賜其所
部鈔萬錠勅遼陽行省毋專決大辟以和林所貯幣
帛給懷寧王所部軍庚戌以吃刺八思幹節兒姪相
加班爲帝師詔梁王勿與雲南行省事賜鈔千錠甲
寅癸惑犯氏戊午歲星犯左執法以樞密副使高興
爲平章政事仍樞密副使賜親王脫脫鈔二千錠奴
兀倫孛羅等金五百兩銀千兩鈔二萬錠以濟寧去
歲霖雨傷稼常寧州饑並賑恤之河間益都般陽屬

縣隕霜殺桑撫之宜黃興國之大冶等縣火給被災者糧一月夏四月庚辰太陰犯井雲南行省請益戍兵不許遣使詣諸路閱其當戍者遣之乙酉大同路地震有聲如雷壞官民廬舍五千餘間壓死二千餘人懷仁縣地裂二所湧水盡黑漂出松栢朽木遣使以鈔四千錠米二萬五千餘石賑之是年租賦稅課徭役一切除免戊子賜察八而朶瓦所遣使者銀千四百兩鈔七千八百餘錠己丑東川路蠻官阿葵以馬二百五十疋金二百五十兩及方物來獻壬辰太白犯井中書省臣言前代郊祀以祖宗配享臣等議

今始行郊禮專祀昊天爲宜詔依所議行之以汴梁歸德安豐去歲被災潭州郴州桂陽東平等路饑並賑恤之五月丁未詔諸王駙馬部屬及各投下凡市傭徭役與民均輸遣官調雲南四川福建兩廣官大都旱遣使持香禱雨戊申徵陝西儒學提舉蕭軒赴闕命有司給以安車戊午改各道肅政廉訪司爲詳刑觀察使聽省臺辟人用之立衍慶司正二品癸亥歲星掩左執法以地震改平陽爲晉寧太原爲冀寧復立洪澤爲陂屯田令河西行省平章阿散領其事省鬱林縣入貴州以晉寧冀寧累歲被災給鈔三萬

五千錠寶慶路饑發粟五千石賑之以陝西渭南櫟陽諸縣去歲旱蠲其田租道州旱六月丙子朔以立皇太子遣中書右丞相荅剌罕哈剌哈孫告昊天上帝御史大夫鐵古迭而告太廟庚辰立皇子德壽爲皇太子詔告天下賜高年帛八十者一匹九十者二匹孝子順孫堪從政者量才任之親年七十別無侍丁者從近遷除外任官五品以下並減一資諸處罪囚淹繫五年以上除惡逆外疑不能決者釋之流竄遠方之人量移內地甲午潼川霖雨江溢漂沒民居溺死者衆勅有司給糧一月免其田租以瓊州屢經

叛寇隆興撫州臨江等路水汴梁霖雨爲災並給糧

一月桓州宣德兩電鳳翔扶風旱暵泰靜海武清蝗

秋七月乙巳朔禁晉寧冀寧大同釀酒蠲晉寧冀寧

今年商稅之半丙午熒惑犯氐辛亥築郊壇於麗正

文明門之南丙位設郊祀署令丞各一員太祝三員

奉禮部二員協律郎一員法物庫官二員癸丑以黑

水新城爲靖安路陞祕書監拱衛司並正三品罷福建

蒙古字提舉司及醫學提舉司賜安西王阿難答子

月魯鐵木而鈔二千錠甲寅太白經天庚申陞大府

監爲大府院壬戌以金千兩銀七萬五千兩鈔十三

萬錠賜興聖太后及宿衛臣出居懷州復置懷寧王
王府官賜威遠王岳木忽而鈔萬錠給大都至上都
十二驛鈔一萬一千二百錠丁卯熒惑犯房以大司
徒段貞中書右丞八都馬辛並為中書平章政事參
知政事合刺蠻子為右丞參知政事迷而火者為左
丞參議中書省事也先伯為參知政事給脫脫所部
乞而言思民糧五月沔陽之玉沙江溢陳州之西華
河溢澤州水賑米四千石揚州之泰興江都淮安之
山陽水蠲其田租九千餘石潭柘衡雷峽滕沂寧海
諸郡饑減直糶糧五萬一千六百石八月乙亥朔省

寺可孫完負寺可孫專治芻粟初惟數人後以各位
增入遂至繁冗至是存十二負餘盡革之丙子給大
都車站戶粟千四百七十餘石丁丑給曲阜林廟洒
掃戶以尚珍署田五十頃供歲祀己卯以龔寧歲復
不登弛山澤之禁聽民採捕命太常卿丑問昭文館
大學士靳德進祭星于司天臺辛巳太陰犯東咸丙
戌商胡塔乞以寶貨來獻以鈔六萬錠給其直癸巳
復立制用院乙未熒惑犯天江賜寧遠王闊闊出鈔
萬錠及其所部三萬錠是月涿州東安州河間嘉興
蝗象州融州柳州旱歸德陳州河溢大名大水揚州

元史本紀卷二十一
九
饑九月戊申聖誕節帝駐驛于壽寧宮受朝賀丁巳
熒惑犯斗庚申車駕至自上都賜威武西寧王出伯
所部鈔三萬錠冬十月丁丑朔陞都水監正三品辛
巳有事于太廟丙戌太白經天己丑命兩廣以南軍
與土人同戍庚寅駙馬按替不花來自朶朶賜銀五
十兩鈔二百錠乙未帝諭中書省樞密院御史臺臣
曰省中政事聽右丞相哈剌哈孫答剌罕總裁自今
用人非與答剌罕共議者悉罷之戊戌詔芍陂洪澤
等屯田爲豪右占據者悉令輸租辛丑復以詳刑觀
察司爲廉訪司常州僧錄林起祐以官田二百八十

頃員爲已業施河西寺勅募民耕種輸其租于官御
史臺臣請增官吏俸命與中書省共議以聞括兩淮
地爲豪民所占者令輸租賦賜安南王陳益稷湖廣
地五百頃諸王忽刺出及昔而吉思來賀立皇太子
賜鈔及衣服弓矢等有差十一月丁未以鈔萬錠給
雲南行省命與貝參用其貝非出本土者同僞鈔論
拘收諸王妃主驛券置大都南城警巡院黃勝許遣
其屬來獻方物請復其子官帝不允曰勝許反側不
足信如其悔罪自至則官可得命賜衣服遣之以去
年冀寧地震站戶貧乏詔諸王駙馬毋妄遣使乘驛

復立雲南屯田命伯顏察而董其事給四川征戍軍士其家居大同為地震壓死者戶鈔五錠庚戌歲星太白鎮星聚於亢癸丑歲星犯亢丙寅歲星晝見庚午祀昊天上帝于南郊牲用馬一蒼犢一羊豕鹿各九其文舞曰崇德之舞武舞曰定功之舞以攝太尉右丞相哈剌哈孫左丞相阿忽台御史大夫鐵古迭而為三獻官壬申太白經天十二月乙亥賜冀寧路鈔萬錠鹽引萬紙以給歲費丙子太白犯西咸地震庚寅熒惑犯壘壁陣皇太子德壽薨己亥辰星犯建星十年春正月壬寅朔高麗王王珣遣使來獻方物甲

辰詔詢訪莊聖皇后昭睿順聖皇后徽仁裕聖皇后儀範中外之政以備紀錄丙午濬吳松江等處漕河四川行省臣言所在驛傳舊制以各路達魯花赤兼督今沿江水驛迂遠宜令所隸州縣官統治之從之增置甘肅行省王渾木敦等處驛傳立福建鹽課提舉司隸宣慰司庚戌濬真揚等州漕河令鹽商每引輸鈔二貫以為傭工之費丁巳太白犯建星戊午罷江南白雲宗都僧錄司汰其民歸州縣僧歸各寺田悉輸租壬戌發河南民十萬築河防丙寅以沙都而所部貧乏給糧兩月丁卯命諸王駙馬妃主奏請錢

穀者與中書議行之陞廵檢爲九品命近侍無輒驛
召外郡官弛大同路酒禁封駙馬合伯爲昭武郡王
營國子學於文宣王廟西偏詔各道禁沮擾鹽法以
京畿雷家站戶貧乏給鈔五百錠奉聖州懷來縣民
饑給鈔九百錠閏正月癸酉太白犯牽牛甲戌賑合
民所部留處鳳翔者糧三月壬午給諸王也先鐵木
而所部米二千石賑暗伯拔突軍屯東地者糧兩月
丁亥免大都今年租賦己丑太白犯壘壁陣甲午以
前中書平章政事鐵哥江浙行省平章闕里河南行
省平章阿散並爲中書平章政事行宣政院使張間

四川行省左丞杜思敬並爲中書左丞參議中書省
事劉源爲參知政事是月以曹之禹城去歲霖雨害
稼民飢發陵州糧二千餘石賑之晉寧冀寧地震不
止二月壬寅賑金蘭站戶不能自贍者糧兩月賑遼
陽千戶小薛干所部貧匱者糧三月辛亥中書省臣
言近侍傳旨以文記至省者凡一百五十餘人令臣
擢用其中犯法妄進者實多宜加遴選制曰可陞行
都水監爲正三品諸路提控案牘爲九品駙馬濟寧
王蠻子帶以所部用度不足乞預貸歲得五戶絲從
之遣六衛漢軍貧乏者還家休息一年丙辰封孛羅

為鎮寧王錫以金印朵瓦遣使來朝賜衣幣遣之戊午太陰犯氏己未江西福建道奉使宣撫塔不帶坐贓遇赦釋其罪終身不叙丁卯以月古不花為中書左丞戊辰車駕幸上都賜安西王阿難荅西平王奧魯赤不里亦鈔三萬錠南哥班萬錠從者三萬二千錠鎮西武靖王搠思班所部民飢發甘肅糧賑之是月大同路暴風大雪壞民廬舍明日雨沙陰霾馬牛多斃人亦有死者三月戊寅歲星犯亢己卯崆古王遣使來貢方物乙未慮大都囚釋上都死囚三人賜駙馬蠻子帶鈔萬錠道州營道等處暴雨江溢山裂

漂蕩民廬溺死者衆復其田租以濟州任城縣民飢賑米萬石給千家木思荅伯部糧三月柳州民飢給糧一月河間民王天下奴弒父磔裂於市夏四月庚子朔詔凡匿鷹犬者沒家貲之半笞三十來獻者給之以賞甲辰樞密院臣言太和嶺屯田舊置屯儲總管府專督其程人給地五十畝歲輸糧三十石或佗役不及耕作者悉如數徵之人致重困乞令軍官統治以宣慰使王龍失不花總其事視軍民所收多寡以為賞罰從之丁未命威武西寧王出伯領甘肅等地軍站事辛酉填星犯亢壬戌雲南羅雄州軍火主

阿邦龍少結豆溫匡虜普定路諸蠻爲寇右丞汪惟能進討賊退據越州諭之不服遣平章也速帶而率兵萬人往捕之兵至曲靖與惟能合從諸王昔寶赤亦里吉帶等進壓賊境獲阿邦龍少斬之餘衆皆潰命也速帶而留軍二千戍之其從軍有功者皆加賞賚癸亥置崑山嘉定等處水軍五萬戶府甲子倭商有慶等抵慶元貿易以金鎧甲爲獻命江浙行省平章阿老瓦丁等脩之賜梁王松山鈔千錠是月以廣東諸郡吉州龍興道州柳州漢陽淮安民飢贛縣暴雨水溢賑糧有差鄭州暴風雨雹大若鷄卵麥及桑棗皆損蠲今年田租真定河間保定河南蝗五月辛未大都旱遣使持香禱雨壬午增河間山東兩浙兩淮福建廣海鹽運司歲煮鹽二十五萬餘引癸未詔西番僧往還者不許馳驛給以舟車禁御史臺宣慰司廉訪司官毋買鹽引乙酉以同知樞密院事塔魯忽台塔刺海並知樞密院事遣高麗國王王珣還國仍署行省以鎮撫之其國僉議密直司等官並授以宣敕封駙馬脫鐵木而爲濮陽王賜以金印公主忙哥台爲鄆國大長公主丁亥詔命右丞相哈刺哈孫荅刺罕左丞相阿忽台等整飭庶務凡銓選錢穀等

事一聽中書裁決百司勤怠者各以名聞賜威武西
寧王出伯鈔三萬錠遼陽益都民饑賑貸有差大都
真定河間蝗平江嘉興諸郡水傷稼六月癸卯御史
臺臣言江南行臺監察御史教化効江浙行省宣使
李元不法行省亦遣人掖拾教化不令檢覈按牘中
書省臣復言教化等不循法度擅遣軍士守衛其門
榜掠李元誣指行省等官實溫省事詔省臺及也可
札魯忽赤同訊之癸丑太陰犯羅堰上星己未歲星
犯亢壬戌來安路總管岑雄叛湖廣行省遣宣慰副
使忽都魯鐵木而招諭之雄令其子世堅來降賜衣

物遣之復淮西道廉訪司大名益都易州大水景州
霖雨龍興南康諸郡蝗秋七月庚辰太陰犯牽牛辛
巳釋諸路罪囚常赦所不原者不與宣德等處雨雹
害稼大同之渾源隕霜殺禾平江大風海溢漂民廬
舍道州之武昌永州之興國黃州沅州饑減直賑糶
米七萬七千八百石八月壬寅歲星犯氐熒惑犯太
微垣上將開成路地震王宮及官民廬舍皆壞壓死
故秦王妃也里完等五千餘人以鈔萬三千六百餘
錠糧四萬四千一百餘石賑之辛亥賜皇姪阿木哥
鈔三千錠丁巳京師文宣王廟成行釋奠禮牲用太

元史本紀卷二十一
九
牢樂用登歌製法服三襲命翰林院定樂名樂章成
都等縣飢減直賑糶米七千餘石九月己巳熒惑犯
太微垣右執法壬申以聖誕節朶瓦遣款徹等來賀
壬午熒惑犯太微垣左執法冬十月甲辰太白犯斗
丁未有事于太廟辛亥太陰犯畢甲寅太陰犯井丁
卯安南國遣黎亢宗來貢方物青山叛蠻紅犵獠等
來附仍貢方物賜金幣各一吳江州大水民乏食發
米萬石賑之十一月己巳車駕還大都辛未歲星犯
房壬申太陰犯虛甲戌熒惑犯亢丁亥武昌路火給
被災者糧一月戊子熒惑犯氐辛卯太陰犯熒惑丙

申安西王阿難忒西平王奧魯赤所部皆乏食給米
有差益都揚州辰州歲飢減直賑糶米二萬一千餘
石十二月壬寅太白晝見乙巳歲星犯東咸壬子速
哥察而等十三站乏食給糧三月乙卯帝有疾禁天
下屠宰四十二日丙辰遣宣政院使沙的等禱于太
廟諸王合而班答部民潰散詔諭所在敢匿者罪之
戊午太陰犯氐癸亥瓊州臨高縣那達洞主王文何
等作亂伏誅磁州民田雲童弑母磔裂于市是歲斷
大辟四十四人

十一年春正月丙辰朔帝大漸免朝賀癸酉崩于玉

德殿在位十有三年壽四十有二乙亥靈駕發引葬起輦谷從諸帝陵是年九月乙丑謚曰欽明廣孝皇帝廟號成宗國語曰完澤篤皇帝成宗承天下混壹之後垂拱而治可謂善於守成者矣惟其末年連歲寢疾凡國家政事內則決於宮壺外則委於宰臣然其不致於廢墜者則以去世祖爲未遠成憲具在故也

本紀卷第二十一

本紀卷第二十二

元史二十二

翰學士雷大和制誥藤國史宋濂翰林待制承直郎知制誥兼國史院編修官王禕等奉勅修

武宗一

武宗仁惠宣孝皇帝諱海山順宗答剌麻八剌之長子也母曰興聖皇太后弘吉刺氏至元十八年七月十九日生成宗太德三年以寧遠王闊闊出總兵北邊怠於備禦命帝即軍中代之四年八月與海都軍戰于闊別列之地敗之十二月軍至按台山乃蠻帶部落降五年八月朔與海都戰于迭怯里古之地海

都軍潰越二日海都悉合其衆以來大戰于合刺合塔之地師失利親出陣力戰大敗之盡獲其輜重悉援諸王駙馬衆軍以出明日復戰軍少却海都乘之帝揮軍力戰突出敵陣後全軍而還海都不得志去旋亦死八年十月封帝懷寧王賜金印置王傳官食瑞州六萬五千戶十年七月自脫忽思圈之地踰按台山追叛王幹羅思獲其妻孥輜重執叛王也孫秃阿等及駙馬伯顏八月至也里的失之地受諸降王秃滿明里鐵木兒阿魯灰等降海都之子察八兒逃于都瓦部盡俘獲其家屬營帳駐冬按台山降王秃

曲滅復叛與戰敗之北邊悉平十一年春聞成宗崩三月自按台山至於和林諸王勲戚畢會皆曰今阿難荅明里鐵木兒等熒惑中宮潛有異議諸王也只里昔嘗與叛王通今亦預謀既辭服伏誅乃因闔辭勸進帝謝曰吾母吾弟在大都俟宗親畢會議之先是成宗違豫日久政出中宮命仁宗與皇太后出居懷州至是仁宗聞訃以二月辛亥與太后俱至京師安西王阿難荅與諸王明里鐵木兒已於正月庚午先至左丞相阿忽台平章八都馬辛前中書平章伯顏中政院使怯烈道興等潛謀推成宗皇后伯要真

氏稱制阿難荅輔之仁宗以右丞相哈刺哈孫之謀
言于太后曰太祖世祖創業艱難今大行晏駕德壽
已薨諸王皆踈屬而懷寧王在朔方此輩潛有異圖
變在朝夕俟懷寧王至恐亂生不測不若先事而發
遂定計誅阿忽台怯列等而遣使迎帝五月至上都
乙丑仁宗侍太后来會左右部諸王畢至會議乃廢
皇后伯要真氏出居東安州賜死執安西王阿難荅
諸王明里鐵木兒至上都亦皆賜死甲申皇帝即位
于上都受諸王文武百官朝於大安閣大赦天下詔
曰昔我太祖皇帝以武功定天下世祖皇帝以文德

治海內列聖相承丕衍無疆之祚朕自先朝肅將天
威撫軍朔方殆將十年親御甲冑力戰却敵者屢矣
方諸藩內附邊事以寧遽聞宮車晏駕廼有宗室諸
王貴戚元勳相與定策於和林咸以朕爲世祖曾孫
之嫡裕宗正派之傳以功以賢宜膺太寶朕謙讓未
遑至於再三還至上都宗親大臣復請於朕間者姦
臣乘隙謀爲不軌賴祖宗之靈母弟愛育黎拔力八
達稟命太后恭行天罰內難既平神器不可久虛宗
桃不可乏祀合辭勸進誠意益堅朕勉徇輿情於五
月二十一日即皇帝位任大守重若涉淵水屬嗣服

之云初其與民更始可大赦天下存恤征戍軍士及供給繁重州郡免上都大都隆興差稅三年其餘路分量重輕優免雲南八畝田楊地面免差發一年其積年逋欠者蠲之逃移復業者免三年被災之處山塲湖泊課程權且停罷聽貧民採取站赤消乏者優之經過軍馬勿得擾民諸處鐵冶許諸人煽辦勉勵學校蠲儒戶差役存問鰥寡孤獨是日追尊皇考曰皇帝尊太母元妃曰皇太后丁亥陞通政院秩正二品陞儀鳳司爲玉宸樂院秩從二品壬辰加知樞密院事朶兒朶海太傅中書右丞相哈剌哈孫荅剌罕

太保並錄軍國重事知樞密院事塔刺海爲中書左丞相預樞密院宣徽院事同知徽政院事朶兀兒也可扎魯忽赤阿沙不花江浙行省平章政事明里不花並爲中書平章政事江浙行省左丞劉正爲中書左丞遙授中書左丞欽察福建道宣慰使也先帖木兒並爲中書叅知政事中書右丞行御史中丞塔思不花爲御史大夫平章政事朶兀兒爲知樞密院事特授乞台普濟中書平章政事延慶使抄兒赤中書右丞同知和林等處宣慰司事塔海中書右丞阿里中書左丞脫脫御史大夫以大都迤北六十二驛驛

戶罷之給鈔調之是月封皇太子乳母李氏爲壽國夫人其夫燕家奴爲壽國公以中書平章政事合散爲遼陽行省平章政事建州大雨雹真定河間順德保定等郡蝗六月癸巳朔詔立母弟愛育黎拔力八達爲皇太子受金寶陞武備寺爲武備院秩從二品甲午建行宮于旺兀察都之地立宮闕爲中都丁酉中書右丞相哈剌哈孫荅刺罕左丞相塔剌海言臣等與翰林集賢太常老臣集議皇帝嗣登寶位詔追尊皇考爲皇帝皇考大行皇帝同母兄也大行皇帝祔廟之禮尚未舉行二帝神主依兄弟次序祔廟爲

宜今擬請謚皇考昭聖衍孝皇帝廟號順宗大行皇帝曰欽明廣孝皇帝廟號成宗太祖之室居中睿宗西第一室世祖西第二室裕宗西第三室順宗東第一室成宗東第二室先元妃弘吉刺氏失憐荅里宜謚曰貞慈靜懿皇后祔成宗廟室制曰可又言前奉旨命臣等議諸王朝會賜與臣等議憲宗世祖登寶位時賞賜有數成宗即位承世祖府庫充富比先例賜金五十兩者增至二百五十兩銀五十兩者增至百五十兩有旨其遵成宗所賜之數賜之戊戌哈剌哈孫荅刺罕言比者諸王駙馬會于和林已蒙賜與

者今不宜再賜帝曰和林之會國事方殷已賜者其再賜之己亥御史大夫脫脫翰林學士承旨三寶奴言舊制皇太子官屬省臺叅用請以羅羅斯宣慰使幹羅思任之中書詔以爲中書右丞班朝諸司聽皇太子各置一人以拱衛直都指揮使馬謀沙角觝屢勝遥授平章政事壬寅塔刺海加太保錄軍國重事太子太師癸卯置詹事院甲辰樞密院請以軍二千五百人繕治上都鷹坊及諸官廨有旨自今非奉旨軍勿輒役以平章政事行和林等處宣慰使都元帥慙刺合兒通政使武備卿鐵木兒不花並知樞密院

事乙巳以金二千七百五十兩銀十二萬九千二百兩鈔萬錠幣帛二萬二千二百八十匹奉興聖宮賜皇太子亦如之中書省臣言中書宰臣十四員御史大夫四員前制所無詔與翰林集賢諸老臣議擬以聞丙午太陰犯南斗杓星徽政使瓜頭等言別不花以私錢建寺爲國祝釐其父爲諸王幹忽所害請賜以幹忽所得歲賜命以五年與之爲銀四千一百餘兩絲三萬一千二百九十斤織幣金百兩絹七百一十匹戊申特授尚乘卿孛蘭奚床兀兒並平章政事大同屯儲軍民總管府達魯花赤怯里木丁中書

右丞辛亥以中書平章政事脫虎脫爲江西行省平章政事壬子封皇妹祥哥刺吉爲魯國大長公主駙馬瑁阿不刺爲魯王鐵木兒不花斡刺合兒等言舊制樞密院銓調軍官公議以聞比者近侍自擇名分從內降旨恐壞世祖定制且誤國事在成宗時嘗有旨輒奏樞密事者許本院再陳臣等以爲自今用人宜一遵世祖成憲帝曰其遵前制餘人勿輒有請又言軍官與民官不同父子兄弟許其相襲此世祖定制比者近侍有輒以萬戶千戶之職請於上者內降聖旨臣等未敢奉行帝曰其依例行之甲寅敕內郡

江南高麗四川雲南諸寺僧誦藏經爲三宮祈福乙卯遣也可扎魯忽赤馬刺赴北軍以印給之丙辰御史大夫塔思不花言殿中司所職中書而下奏事者必使隨之以入不在奏事之列者聽其引退班朝百官朝會失儀者得糾劾病故者必以告請如舊制又言舊制內外風憲官有所彈劾諸人勿預而近有受賕爲監察御史所劾者獄具寅緣奏請託言事入覲以避其罪臣等以爲今後有罪者勿聽至京待其對辨事竟果有所言方許奏陳皆從之塔思不花又言皇太子有旨有司贓罪不須刑部定議受敕者從廉訪

司處決省臺遣人檢覈廉訪司文案則私意沮格非便平章阿沙不花因言此省臺同議之事臺臣不宜獨奏帝曰此御史臺事阿沙不花勿妄言臺臣言是也如所奏行之塔思不花脫脫並遙授左丞相戊午進封高麗王王矩爲瀋陽王加太子太傅駙馬都尉置皇太子家令司府正司延慶司典寶署典膳署已未封寧遠王闍闐出爲寧王賜金印庚申遙授左丞相行御史大夫塔思不花右丞相辛酉汴梁南陽歸德江西湖廣水保定屬縣蝗秋七月癸亥朔封諸王秃刺爲越王諸王出伯言瓜州沙州屯田逋戶漸成

丁者乞拘隸所部中書省臣言瓜州雖諸王分地其民役於驛傳出伯言宜勿從陞章佩監爲章佩院秩從二品賜阿刺納八刺鈔萬錠甲子命御史臺大夫鐵古迭兒知樞密院事塔魯忽帶中書平章政事床兀兒以即位告謝南郊丙寅以禮店蒙古萬戶屬土番宣慰司非便命仍舊隸脫思麻宣慰司防守陝州諸王駙馬入覲者非奉旨不許給驛以中書叅知政事趙仁榮爲太子詹事以阿保功授明里大司徒封其妻梅仙爲順國夫人賜床兀兒軍士鈔六萬錠幣帛二萬匹遣肥兒牙兒迷的里及鐵肫胆詣西域取

佛鉢舍利肥兒牙兒迷的里遙授宣政使鐵臄胆遙
授平章政事以並命太傅右丞相哈刺哈孫荅刺罕
太保左丞相塔刺海綜理中書庶務詔諭中外已巳
太陰犯亢置宮師府設太子太師少師太傅少傅太
保少保賓客左右諭德贊善庶子洗馬率更令丞司
經令丞中允文學通事舍人校書正字等官壬申命
御史大夫鐵古迭兒中書平章政事床兀兒樞密副
使孛蘭奚以即位祇謝太廟以安西平江吉州三路
爲皇太子分地越州路爲越王禿剌分地賜諸王八
不沙鈔萬錠癸酉罷和林宣慰司置行中書省及稱

海等處宣慰司都元帥府和林總管府以太師月赤
察兒爲和林行省右丞相中書右丞相哈刺哈孫荅
刺罕爲和林行省左丞相依前太傅錄軍國重事江
浙水民饑詔賑糧三月酒醋門攤課程悉免一年乙
亥以永平路爲皇妹魯國長公主分地租賦及土產
悉賜之賜越王禿剌鈔萬錠諸王兀都思不花所部
三萬五千二百二十錠丙子以江浙行省平章政事
塔失海牙知樞密院事床兀兒並爲中書平章政事
丁丑封諸王八不沙爲齊王朶列納爲濟王迭里哥
兒不花爲北寧王太師月赤察兒爲淇陽王加平章

政事脫虎脫太尉以中書左丞相塔刺海爲中書右丞相監修國史御史大夫塔思不花爲中書左丞相江浙行省平章政事教化河南江北行省平章政事法忽魯丁並爲中書平章政事平章政事鐵木迭兒爲江西行省平章政事戊寅以儀鳳司大使火失海牙鐵木兒不花教坊司達魯花赤沙的並遙授平章政事爲玉宸樂院使己卯以集賢院使別不花爲中書平章政事七月庚辰以御史中丞只兒合郎爲御史大夫辛巳加封至聖文宣王爲大成至聖文宣王右丞相塔刺海左丞相塔思不花言中書庶務同僚一二近侍

往往不俟公議即以上聞非便今後事無大小請共議而後奏帝曰卿等言是自今庶政非公議者勿奏置行工部於旺兀察都以遙授左丞相同知樞密院事也兒吉尼知樞密院事御史中丞王壽江浙行省左丞郝天挺並爲中書左丞壬午熒惑犯南斗命御史大夫鐵古迭兒知樞密院事塔魯忽帶中書平章政事床兀兒以即位告社稷祭未陞利用監爲利用院秩從二品甲申遣贍思丁使西域遙授福建道宣慰使乙酉賜壽寧公主鈔萬錠丙戌以內郡歲歉令諸王衛士還大都者東汰以入從和林省臣請乞如

甘肅省例給鈔二千錠歲收子錢以佐供給仍以網
罟賜貧民御史大夫月兒魯言舊制中書省樞密院
御史臺宣政院許得自選其人他司悉從中書鈐擇
近臣不得輒奏如此則紀綱不紊帝嘉納之以同知
宣徽院事孛羅答失爲中書左丞中書叅知政事欽
察爲四川行省左丞江浙湖廣江西屬郡饑詔行省
發粟賑之丁亥使完澤偕乞兒乞帶亦難徃徵乞兒
吉思部秃魯花驟馬鷹鷄山東河北蒙古軍告饑遣
官賑之賜晉王部貧民鈔五萬錠已丑塔剌海塔思
不花言前乃顏叛其繫虜之人奉世祖旨俱隸版籍

比者近臣請以歸之諸王脫脫彼即遣人拘括臣等
以爲此事具有先制今已歸脫脫所部宜令遼陽省
臣薛閣干等徃諭之已拘之人悉還其主從之安西
等郡旱饑以糧二萬八千石賑之庚寅置延福司秩
正三品辛卯詔唐兀秃魯花戶籍已定其入諸王駙
馬各部避役之人及冒匿者皆有罪發卒二千人爲
晉王也孫鐵木兒治邸舍是月江浙湖廣江西河南
兩淮屬郡饑於鹽茶課鈔內折粟遺官賑之詔富家
能以私粟賑貸者量授以官保定河間晉寧等郡水
德州蝗八月甲午中書省臣言內降旨與官者八百

八十餘人已除三百未議者猶五百餘請自今越奏者勿與帝曰卿等言是自今不由中書奏者勿與官又言外任官帶相銜非制也請勿與制可又言以朝會應賜者爲鈔總三百五十萬錠已給者百七十萬未給猶百八十萬兩都所儲已虛自今特奏乞賞者宜暫停有旨自今凡以賞爲請者勿奏御史臺臣言中書省樞密院御史臺宣政院得自選官具有成憲今監察御史廩訪司官非本臺公選而從諸臣所請自內降旨非祖宗成法帝曰凡若此者卿等其勿行浙東浙西湖北江東郡縣饑遣官賑之賜山後驛戶

鈔每驛五百錠置掌儀署秩五品設令丞各一員乙未賜諸王按灰阿魯灰北寧王迭里哥兒不花金三百五十兩銀三千七百兩以治書侍御史烏伯都刺爲中書叅知政事戊戌御史大夫脫脫封秦國公辛丑迤北之民新附者置傳輸粟以賑之癸卯改也里合牙營田司爲屯田運糧萬戶府甲辰以納蘭不刺所儲糧萬石賑其旁近饑民丙午建佛閣於五臺寺江南饑以十道廉訪司所儲贓罰鈔賑之己酉從皇太子請陞詹事院從一品置叅議斷事官如樞密院辛亥中書右丞孛羅鐵木兒以國字譯孝經進詔曰此乃孔子之微言自王公

達於庶民皆當由是而行其命中書省刻板模印諸王而下皆賜之癸丑唐兀禿魯花軍乏食發粟賑之丙辰陞闡遺監秩三品丁巳以中書左丞王壽爲御史中丞戊午中書平章政事乞台普濟床兀兒別不花並加太尉中書右丞塔海加太尉平章政事以中書左丞孛羅鐵木兒爲中書右丞東昌汴梁唐州延安潭沅歸澧興國諸郡饑發粟賑之異寧路地震河間真定等郡蝗隆平文水平遥祁霍邑靖海容城東鹿等縣水九月甲子車駕至上都乙丑請謚皇考皇帝大行皇帝于南郊命中書右丞相塔刺海攝太尉行事庚午陞御史臺從二

品辛未加塔刺海塔思不花並太尉壬申命塔刺海奉玉冊玉寶上皇考及大行皇帝尊謚廟號又上先元妃弘吉烈氏尊謚祔于成宗廟室陞尚舍監秩正三品癸酉太白犯右執法甲戌改太常寺爲太常禮儀院秩正二品陞侍儀司秩正三品丙子置皇子位典牧監秩正三品中書省臣言內外選法向者有旨一遵世祖成制兩宮近侍遷叙惟上所命比有應入常調者寅緣驟遷其已仕廢黜及未嘗入仕者亦復請自內降旨臣等奏請禁止蒙賜允從是後所降內旨復有百餘臣等已嘗銓擇奉行第中書政務他人又

得輒請責以整飭其效寔難自今銓選錢穀請如前制非由中書議者毋得越奏制從之又言比怯來木丁獻寶貨勅以鹽萬引與之仍許市引九萬臣等竊謂所市寶貨既估其直止宜給鈔若以引給之徒壞鹽法帝曰此朕自言非臣下所請其給之餘勿視爲例江浙饑中書省臣言請令本省官租於九月先輸三分之一以備賑給又兩淮漕河淤澁官議䟽濬鹽一引帶收鈔二貫爲傭費計鈔二萬八千錠今河流已通宜移以賑饑民杭州一郡歲以酒糜米麥二十八萬石禁之便河南益都諸郡亦宜禁之制可塔刺海言比蒙聖恩賜臣江南田百頃今諸王公主駙馬賜田還官臣等請還所賜從之仍諭諸人賜田悉令還官命張留孫知集賢院事領諸路道教事丁丑中書省臣言比議省臣負數奉旨依舊制定爲十二負右丞相塔刺海左丞相塔思不花平章床兀兒乞台普濟如故餘令臣等議臣等請以阿沙不花塔失海牙爲平章政事孛羅荅失劉正爲右丞郝天挺也先鐵木兒爲左丞于璋兀伯都刺爲叅知政事其班朝諸司冗負並宜東汰從之己卯太白犯左執法壬午改尚乘寺爲衛尉院秩從二品甲申詔立尚書省分

理財用命塔刺海塔思不花仍領中書以脫虎脫教
化法魯忽丁任尚書省仍俾其自舉官屬命鑄尚書
省印敕弛江浙諸郡山澤之禁丙戌陞掌謁司秩三
品皇太子建佛寺請買民地益之給鈔萬七百錠有
奇戊子陞延慶司秩從二品己丑遣使錄囚晉王也
孫鐵木兒以詔賜鈔萬錠止給八千爲言中書省臣
言帑藏空竭常賦歲鈔四百萬錠各省備用之外入
京師者二百八十萬錠常年所支止二百七十餘萬
錠自陛下即位以來已支四百二十萬錠又應求而
未支者一百萬錠臣等慮財用不給敢以上聞帝曰

卿之言然自今賜予宜暫停諸人毋得奏請可給晉
王鈔千錠餘移陝西省給之以中書平章政事別不
花爲江浙行省平章政事辛卯御史臺臣言至元中
阿合馬綜理財用立尚書省三載併入中書其後桑
哥用事復立尚書省事敗又併入中書粵自大德五
年以來四方地震水災歲仍不登百姓重困便民之
政正在今日頃又聞爲總理財用立尚書省如是則
必增置所司濫設官吏殆非益民之事也且綜理財
用在人爲之若止命中書整飭未見不可臣等隱而
不言懼將獲罪帝曰卿言良是此三臣願任其事姑

聽其行焉是月襄陽霖雨民饑敕河南省發粟賑之
十月乙未陞典寶署為典寶監秩正三品庚子中書
省奏初置中書省時太保劉秉忠度其地宜裕宗為
中書令嘗至省署勅其後桑哥遷立尚書省不四載
而罷今復遷中書於舊省乞消吉徙中書令位仍請
皇太子一至中書制可壬寅陞典瑞監為典瑞院秩
從二品封知樞密院事床兀兒為容國公癸卯以舊
制諸王駙馬事務皆內侍宰臣所領命中書右丞孛
羅鐵木兒領之乙巳太白犯亢敕方士日者毋游諸
王駙馬之門丙午詔整飭臺綱布告中外封御史大

夫鐵古迭兒為鄆國公以中衛親軍都指揮使買奴知
樞密院事壬子從中書省臣言凡事不由中書輒遣使
并移文者禁止之甲寅太陰犯明堂陞集賢院秩從一
品將作院秩從二品丙辰以行省平章總督軍馬得佩
虎符其左丞等所佩悉追納中書省奏常歲海漕糧百
四十五萬石今江浙歲儉不能如數請仍舊例湖廣江
西各輸五十萬石並由海道達京師從之己未塔思不
花上疏言政事且辭太尉職還所降制書及印是月杭
州平江水民饑發粟賑之十一月癸亥封諸王牙忽都
為楚王賜金印置王傳建佛寺於五臺山乙丑中書省

臣言宿衛廩給及馬馳芻料父子兄弟世相襲者給之
不當給者請令字可孫汰之今會是年十月終馬馳九
萬三千餘至來春二月闕芻六百萬束料十五萬石比
又增馬五萬餘匹此國重務臣等敢以上聞有旨不當給者
勿給丙寅帝朝隆福宮上皇太后玉冊玉寶丁卯太白犯
房闕兒伯牙里言更用銀鈔銅錢便命中書與樞密院
御史臺集賢翰林諸老臣集議以聞己巳中書省臣阿
沙不花孛羅鐵木兒言臣等與闕兒伯牙里面論折銀
鈔銅錢非便有旨卿等以為不便勿行可也詔中書省
官十二員脫虎脫仍領宣政院教化留京師其餘各任以
職庚午盧龍灤河遷安昌黎撫寧等縣水民饑給鈔千
錠以賑之辛未以塔刺海領中政院事乙亥中書省臣言
大都路供億浩繁槩於屬郡取之其軍站鷹坊控鶴等
戶恃其雜徭無與冒占編氓請降璽書依祖宗舊制悉
令均當或輒奏請者亦宜禁止制可皇太子言近蒙恩
以安西吉州平江為分地租稅悉以賜臣臣恐宗親昆
弟援例自五戶絲外餘請輸之內帑其陝西運司歲辦
鹽十萬引向給安西王以此錢斟酌與臣惟陛下裁之
中書計會三路租稅及鹽課所入鈔四十萬錠有旨皇
太子所思甚善歲以十萬錠給之不足則再賜樂工殿

人刑部捕之王宸樂院長謂王宸與刑部秩皆三品官皆榮祿大夫留不遣中書以聞帝曰凡諸司視其資級授之散官不可超越其閑冗職各官高者遵舊制降之建康路屬州縣饑詔免今年酒醋課丙子太陰犯東斗丁丑中書省臣言前爲江南大水以茶鹽課折收米賑饑民今商人輸米中鹽以致米價騰湧百姓雖獲小利終爲無益臣等議茶鹽之課當如舊從之戊寅授皇太子王冊己卯以皇太子受冊禮成帝御大明殿受諸王百官朝賀庚辰中書省臣言皇太子謂臣等曰吾之分地安西平江吉州三路遵舊制自達魯花赤之外悉從常

選其常選宜速擇才能有旨其擇人任之乙酉太陰犯亢詔皇太后軍民人匠等戶租賦徭役有司勿與並隸徽政院陞太僕院秩從二品丁亥杭州平江等處大饑發糧五十萬一千二百石賑之庚寅賜太師月赤察兒江南田四十頃時賜田悉奪還官中書省爲言有旨月赤察兒自世祖時積有勲勞非餘人比宜以前後所賜合百頃與之仍敕行省平章別不花領其歲入辛卯辰星犯歲星從皇太子請御史臺檢覈詹事院文案十二月壬辰朔中書省臣言舊制金虎符及金銀符典瑞院掌之給則由中書事已則復

歸典瑞院今出入多不由中書下至商人結託近侍
奏請以致泛濫出而無歸臣等請覈之自後除官及
奉使應給者非由中書省勿給從之又言今國用甚
多帑藏已乏用及鈔毋非宜鹽引向從運司與民爲
市今權時制宜從戶部鬻鹽引八十萬便有旨今歲
姑從所請後勿復行又言太府院爲內藏世祖成宗
朝遇重賜則取給中書今所賜有踰千錠至萬錠者
皆取之太府比者太府取五萬錠已支二萬矣今復
以乏告請自後內府所用數多者仍取之中書帝曰
此朕特旨後當從所奏乙未赤塔塔兒等擾檀州民

強取米粟六百餘石遣官訊之辛丑辛大聖壽萬安
寺授吏部尚書察乃平章政事領工部事癸卯以漢
軍萬人屯田和林命留守司以來歲正月十五日起
燈山於大明殿後延春閣前庚戌陞行泉府司爲泉
府院秩正二品以蒙古萬戶禿堅鐵木兒有平內難
功加鎮國上將軍陞皇太子典醫署爲典醫監秩正
三品山東河南江浙饑禁民釀酒丁巳以中書省言
國用浩穰民貧歲歉詔宣政院併省佛事大都上都
二驛設教授官二員餘驛一員敕諸王公主駙馬使
臣給璽書驛券不許輒用圓符乘驛中書省臣言驛戶

疲乏宜量事給驛今經費浩大其收售寶貨權宜停
罷又陛下即位詔書不許越職奏事比者近侍奏除
官丐賞者皆自內降旨請今不經中書省勿行又刑
法者譬之權衡不可偏重世祖已有定制自元貞以
來以作佛事之故放釋有罪失於太寬故有司無所
遵守今請凡內外犯法之人悉歸有司依法裁決又
各處民饑除行宮外工役請悉停罷皆從之又言律
令者治國之急務當以時損益世祖嘗有旨金泰和
律勿用令老臣通法律者叅酌古今從新定制至今
尚未行臣等謂律令重事未可輕議請自世祖即位以

來所行條格校讎歸一遵而行之制可庚申詔曰仰
惟祖宗應天撫運肇啓疆宇華夏一統罔不率從逮
朕嗣服丕圖纘膺景命遵承詒訓恪慕洪規祇惕畏
競未知攸濟永思創業艱難之始竦然軫念而守成
萬事之統在予一人故自即位以來溥從寬大量能
授官俾勤乃職夙夜以永康兆民爲急務間者歲比
不登流民未還官吏並緣侵漁上下因循和氣乖戾
是以責任股肱耳目大臣思所以盡瘁贊襄嘉猷朝
夕入告朕命惟允庶事克諧樂與率土之民共享治
安之化邇寧遠肅顧不躋歟可改大德十二年爲至

大元年誕布惟新之令式享永固之休存恤征戍蒙
古漢軍拯治站赤消乏弛山場河泊蘆蕩禁圍獵飛
放毋得搔擾百姓招誘流移人戶禁投屬怯薛及鷹
房避役濫請錢糧勸農桑興學校議貢舉旌賞孝弟
方田懲戒游惰政令得失許諸人上書陳言僧道也
里可溫答失蠻並依舊制納稅允選法錢糧刑名造
作一切公事近侍人負毋得隔越聞奏敕內庭作佛
事毋釋重囚以輕囚釋之

至大元年春正月辛酉朔曲赦御史臺見繫犯賊官
吏罪止徵贓罷職癸亥敕樞密院發六衛軍萬八千

五百人供旺兀察都建宮工役甲子授中書平章政
事阿沙不花右丞相行御史大夫丙寅徙江浙行省
請罷行都水監以其事隸有司立皇太子位典懃署
承和署秩並正五品丁卯以中書右丞也罕的斤爲
平章政事議陝西省事己巳紹興台州慶元廣德建
康鎮江六路饑死者甚衆饑戶四十六萬有奇戶月
給米六斗以沒入朱清張瑄物貨隸徽政院者鬻鈔
三十萬錠賑之特授乳母夫壽國公楊燕家奴開府
儀同三司己巳緬國進馴象六辛未樞密院臣言先
奉旨以中衛親軍隸皇太子位皇太子謂臣等曰世

祖立五衛以應五方去一不可宜各翼選漢軍萬人
別立一衛帝以爲然敕知院事鐵木兒不花等摘漢
軍萬人別立衛甲戌中書省臣言進海東青鷗者當
乘驛馬五百不敷敕遣怯列應童括民間車馬兵部
請以各驛馬陸續而進勿括爲便從之改徽政院人
匠總管府爲繕珍司秩正三品己卯陸中尚監爲中
尚院秩從二品詔王出伯進玉六百一十五斤賜金
千五百兩銀二萬兩鈔萬錠從人四萬錠寬闊也先
孛可等金二千三百兩銀一萬七百兩鈔三萬九千
一百錠甲申勅床兀兒除登極恩例外特賜金五百

兩銀千兩鈔二千錠戊子皇太子請以阿沙不花復
入中書脫脫復入御史臺己酉中書省臣言阿失鐵
木兒請遣教化的詣河西地采玉馱攻玉沙需馬四
十餘匹采玉人千餘臣等以爲不急之務勞民乞罷
之又言近百姓艱食盜賊充斥苟不嚴治將至滋蔓
宜遣使巡行遇有罪囚即行決遣與隨處官吏共議
弭盜方略明立賞罰或匿盜不聞或期會不至或踰
期不獲者官吏連坐又言江浙行省海賊出沒殺虜
軍民其已獲者例合結案待報宜從中書省也可札
魯忽赤遣官同行省行臺宣慰司廉訪司審錄無寬

元史卷之三十一
三十一
棄之於市其未獲者督責追捕自首者原罪給粟能禽其黨者加賞有旨弭盜安民事爲至重宜即議行之封諸王也先鐵木兒爲營王以乳母夫幹耳朶爲司徒二月癸巳立鷹坊爲仁虞院秩正二品以右丞相脫脫遙授左丞相禿剌鐵木兒也可扎魯忽赤月里赤並爲仁虞院使汝寧歸德二路旱蝗民饑給鈔萬錠賑之甲午增泉府院副使同僉各一員益都濟寧般陽濟南東平泰安大饑遣山東宣慰使王佐同廉訪司覈實賑濟爲鈔十萬二千二百三十七錠有奇糧萬九千三百四十八石乙未中書省臣言陛下

登極以來錫賞諸王恤軍力賑百姓及殊恩泛賜帑藏空竭豫賣鹽引今和林甘肅大同隆興兩都軍糧諸所營繕及一切供億合用鈔八百二十餘萬錠往者或遇匱急奏支鈔本臣等固知鈔法非輕曷敢輒動然計無所出今乞權支鈔本七百一十餘萬錠以周急用不急之費姑後之帝曰卿等言是泛賜者不以何人毋得蒙蔽奏請陞尚舍監爲尚舍寺秩正三品丙申立甄用監秩正三品隸徽政院淮安等處饑從河南行省言以兩浙鹽引十萬貿粟賑之戊戌以上都衛軍三千人赴旺兀察都行宮工役壬寅中書

省臣言貴赤擾害檀州民敕遣人徃訊其辭伏者宜加罪有旨勿問臣等以爲非宜已辭伏者先爲決遣帝曰俟其獵畢治之從皇太子請改詹事院使爲詹事副詹事爲少詹事院判爲丞立尚服院秩從二品中書省臣言陝西行省言開成路前者地震民力重困已免賦二年請再免今年從之甲辰賜國王和童金二百五十兩銀七百五十兩立皇太子衛率府發軍千五百人修五臺山佛寺命有司市邸舍一區以賜丞相赤囚鐵木兒爲鈔萬九千四百錠丁未用丞相低頭言設尚冠尚衣尚輿尚沐尚輦尚飾六奉御秩五品凡四十八員隸尚服院甲寅和林貧民北來者衆以鈔十萬錠濟之仍於大同隆興等處糶糧以賑就令屯田諸內侍太醫陰陽樂人毋援常選散官以網罟給和林饑民戊午遣不達達思等送爪哇使還己未以皇太子建佛寺立營繕署秩五品三月庚申朔中書省臣言郇王拙忽難人戶散失詔有司括索臣等議昔阿只吉括索所失人戶成宗慮其爲例不許今若括索未免擾民且諸王必多援例乞寢其事從之又莊聖皇后及諸王忽秃秃人戶散入他郡阿都赤脫歡降璽書俾括索陝西行省及真定等路

言百姓均在國家版籍今所遣使輒奪軍驛編民等
戶非宜中書省臣以聞帝曰彼奏誤也卿等速追以
還賜鎮南王老章金五百兩銀五千兩鈔二千錠幣
帛八百匹也先不花牙兒昔金各二百五十兩銀七
百五十兩鈔二千錠乙丑太陰犯井以北來貧民八
十六萬八千戶仰食於官非久計給鈔百五十萬錠
幣帛準鈔五十萬錠命太師月亦察兒太傅哈刺哈
孫分給之罷其廩給賜諸王八亦忽金百五十兩銀
七百五十兩丁卯建興聖宮給鈔五萬錠絲二萬斤
遣使祀五嶽四瀆名山大川諸王賜八不沙金五百

兩銀五千兩復立白雲宗攝所秩從二品設官三員
戊寅車駕幸上都建佛寺於大都城南立驥用資武
二庫秩正五品隸府正司陞太史院秩從二品司天
臺秩正四品封中書右丞相行平章政事阿沙不花
爲康國公以甘肅行省右丞脫脫木兒爲中書平章
政事加大司徒賜晉王所部五百四十七人鈔五萬
二千九百六十錠定王藥木忽兒金千五百兩銀三
萬兩鈔萬錠衛士五十三人鈔萬六百錠己卯命翰
林國史院纂脩順宗成宗實錄壬午嗣漢天師張與
材來朝加金紫光祿大夫封留國公夏四月戊戌中

書省臣言請依元降詔敕勿超越授官泛濫賜賚帝
曰卿等言是朕累有旨止之又復蒙蔽以請自今縱
有旨卿等其覆奏罪之詔以永平路鹽課賜祥哥刺
吉公主中書省臣執不可從之賜諸王木南子金五
十兩銀千兩鈔千錠賜皇太子位鷹坊鈔二十萬錠
戊戌封三寶奴爲渤海國公香山爲賓國公加鐵木迭
兒右丞相都護買住中書右丞立皇太子位人匠總
管府秩正三品癸卯加授平章政事教化太子太保
太尉平章軍國重事魏國公甲辰陞典瑞監爲典瑞
院秩從二品知樞密院事也兒吉尼遙授右丞相辛
亥樞密院臣言諸王各用其印符乘驛使臣旁午驛
戶困乏宜準舊制量其馬數降以璽書奏可乙卯遣
米楫等使蘇魯國丙辰高麗國王王章言陛下令臣
還國復設官行征東行省事高麗歲數不登百姓乏
食又數百人仰食其土則民不勝其困且非世祖舊
制帝曰先請立者以卿言今請罷亦以卿言其準世
祖舊制速遣使往罷之五月丙寅降英德路爲州知
樞密院事塔魯忽台遙授左丞相丁卯御史臺臣言
成宗朝建國子監學迄今未成皇太子請畢其功制
可己巳管城縣大雨雹緬國進馴象六乙亥知樞密

院事慙刺合兒遙授左丞相丙子以諸王及西番僧
從駕上都途中擾民禁之禁白蓮社毀其祠宇以其
人還隸民籍御史臺臣言比奉旨罷不急之役今復
爲各官營私宅臣等以爲俟旺兀察都行宮及大都
五臺寺畢工然後從事爲宜有旨除伙頭三寶奴所
居餘悉罷之授右丞相塔思不花上柱國監修國史
加左丞相乞台普濟太子太傅辛巳中書省臣言舊
制樞密院御史臺宣政院得自選官諸官府必由中
書省奏聞遷調宜申嚴告諭制可癸未濟南般陽雨
雹甲申立大同侍衛親軍都指揮使司以丞相赤因

鐵木兒爲使摘通惠河漕卒九百餘人隸之漕事如
故渭源縣旱饑給糧一月真定大名廣平有蟲食桑
寧夏府水晉寧等處蝗東平東昌益都蠧六月己丑渤
國公三寶奴加錄軍國重事中書右丞相應國公太
子詹事平章軍國重事大司農曲出加太子太保左
丞相脫脫加上柱國太尉遙授叅知政事行詹事丞
大慈都加平章軍國重事甲午改太子位丞和署爲
典樂司秩正三品丁酉鞏昌府隴西寧遠縣地震雲
南烏撒烏蒙三日之中地大震者六戊戌大都饑發
官廩減價糶貧民戶出印帖委官監臨以防不均之

元史本紀卷第三十二 二十七
弊中書省臣言江浙行省管內饑賑米五十三萬五千石鈔十五萬四千錠麵四萬斤又流民戶百三十三萬九百五十有奇賑米五十三萬六千石鈔十九萬七千錠鹽折直為引五千令行省行臺遣官臨視內郡江淮大饑免今年常賦及夏稅益都水民饑采草根樹皮以食免今歲差徭仍以本路稅課及發朱汪利津兩倉粟賑之封藥木忽兒為定王駙馬阿失為昌王並賜金印以司徒平章政事領大司農李邦寧遙授左丞相辛丑以沒入朱清張瑄田產隸中宮立江浙財賦總管府提舉司己酉減太常禮儀院官二

十七員為八員河南山東大饑有父食其子者以兩道沒入賦鈔賑之加乞台普濟錄軍國重事是月保定真定蝗秋七月庚申流星起自勾陳南行圓若車輪微有銳經貫索滅敕以金銀歲入數少自今毋問何人以金銀為請奏及托之奏者皆抵罪又各處行省宣慰司等官多以結托來京師今後非奉朝命毋赴闕雲南湖廣河南四川盜賊竊發諭軍民官用心撫治立廣武康里侍衛親軍都指揮使司以中書平章政事阿沙不花為都指揮使壬戌皇子和世珠請立總管府領提舉司四括河南歸德汝寧境內瀕河

荒地約六萬餘頃歲收其租令河南省臣高興總其事中書省臣言瀕河之地出沒無常遇有退灘則爲之主先是有亦馬罕者妄稱省委括地蠶食其民以有主之田俱爲荒地所至騷動民高榮等六百人訴于都省追其驛券方議其罪遇赦獲免今乃獻其地于皇子且河南連歲水災人方闕食若從所請設立官府爲害不細帝曰安用多言其止勿行禁鷹坊於大同隆興等處縱獵擾民築呼鷹臺於朔州澤中發軍千五百人助其役旺兀察都行宮成立中都留守司兼開寧路都總管府丙寅復置泰安州之新

泰縣辛卯濟寧大水入城詔遣官以鈔五千錠賑之已巳真定淫雨水溢入自南門下及橐城溺死者百七十七人發米萬七百石賑之辛未立御香局秩正五品壬申太白犯左執法香山加太子太傅遣塔察兒等九人使諸王寬闊遣月魯等十二人使諸王脫脫祭酉詔諭安南國曰惟我國家以武功定天下文德懷遠人乃眷安南自乃祖乃父世修方貢朕甚嘉之邇者先皇帝晏駕朕方撫軍朔方爲宗室諸王貴戚元勳之所推戴以謂朕乃世祖嫡孫裕皇正派宗藩效順於外臣民屬望於下人心所共神器有歸朕

元史卷之二十一
三十一
俯徇輿情大德十一年五月二十一日即皇帝位於上都今遣少中大夫禮部尚書阿里灰朝請大夫史部侍郎李京朝列大夫兵部侍郎高復禮諭旨尚體同仁之視益堅事大之誠輯寧爾邦以稱朕意又以管祝思監爲禮部侍郎朶兒只爲兵部侍郎使緬國遣脫里不花等二十人使諸王合兒班答弛上都酒禁壬午置皇太子司議郎秩正五品封乃蠻帶爲壽王癸未樞密院臣言世祖時樞密臣六員成宗時增至十三員今署事者三十二員乞省之敕罷塔思帶等一十一人甲申太師淇陽王月赤察曰請置王傳

中書省臣謂異姓王無置傳例不許乙酉以叅虎人徹兒怯思爲監察御史是月以左丞相塔思不花爲中書右丞相太保乞台普濟爲中書左丞相內外大小事務並聽中書省區處諸王公主駙馬勢要人等毋得攬擾沮壞近侍臣員及內外諸衙門毋得隔越聞奏各處行省宣慰司及在外諸衙門等官非奉聖旨并中書省明文毋得擅自離職乘驛赴京管幹私事江南江北水旱饑荒已嘗遣使賑恤者至大元年差發官稅並行除免八月戊子大寧雨雹丙申御史臺臣言奉敕逮監察御史撒都丁赴上都世祖成宗迄

於陛下累有明旨監察御史乃朝廷耳目中外臣僚
作姦犯科有不職者聽其糾劾治事之際諸人母得
與焉邇者鞠問刑部尚書烏刺沙賊罪蒙玉音將大
諭諸御史皆被錫賚臺綱益振今撤都丁被逮同列
皆懼所繫非小乞寢是命申明臺憲之制諸人母得
與聞制可辛丑以中都行宮成賞官吏有勞者工部
尚書黑馬而下並陞二等賜塔刺兒銀二百五十兩
同知察乃通政使塔利赤同知留守蕭珍工部侍郎
荅失蠻金二百兩銀一千四百兩軍人金二百兩銀
八百兩死於木石及病沒者給鈔有差癸卯加中書

右丞領將作院呂天麟大司徒戊申立中都萬億庫
寧夏立河渠司秩五品官二員參以二僧為之特授
瓜頭太師賜諸王脫歡金三百兩銀二千五百兩鈔
二千錠阿里不花金百兩銀千兩鈔千錠己酉大同隕霜殺
禾甲寅李邦寧以建香殿成賜金五十兩銀四百五十兩乙卯
中書省臣言外臺行省及諸人應詔言事未敢一一
上煩聖聽請集朝臣議擇其切於事者小則輒行大
則以聞從之揚州淮安蝗九月丙辰以內郡歲不登
諸部人馬之入都城者減十之五中書省臣言夏秋
之間鞏昌地震歸德暴風雨秦安濟寧真定大水廬

舍蕩析人畜俱被其災江浙饑荒之餘疫癘大作死者相枕籍父賣其子夫鬻其妻哭聲震野有不忍聞臣等不才猥當大任雖欲竭盡心力而聞見淺狹思慮不廣以致政事多舛有乖陰陽之和百姓被其災殃願退位以避賢路帝曰蕃害事有由來非爾所致汝等但當慎其所行立法憐口提舉司秩正五品設官四員高麗國王王暉卒命雪尼台鐵木察使薛迷思干部己未陞中政院秩從一品辛酉遣人使諸王察八兒寬閣所壬戌太尉脫脫奏泉州大商合只鐵即刺進異木沉檀可構宮室者敕江浙行省驛致之

癸亥萬戶也列門合散來自薛迷思干等城進呈太祖時所造戶口青冊賜銀鈔幣帛有差丙寅蒲縣地震癸酉陞內史府爲內史院秩正二品乙亥車駕至自上都弛諸路酒禁戊寅泉州大商馬合馬丹的進珍異及寶帶西域馬庚辰以高麗國王王章嗣高麗王諸王禿蒲進所藏太宗玉璽封禿蒲爲陽翟王賜金印中書省臣言奉旨連歲不登從駕四衛一衛約四百人所給芻粟自如常例給各部者減半臣等議大都去歲飼馬九萬四千疋今請減爲五萬疋外路飼馬十一萬九千餘疋今請減爲六萬疋自十月十

五日爲始又言薛迷思干塔刺思塔失玄等城三年
民賦以輸縣官今因薛尼台鐵木察往彼宜令以二
年之賦與寬闡給與元輸之人以一年者上進並從
之癸未太陰犯熒惑立中都虎賁司特授承務郎直
省舍人箴吉沙資善大夫行泉府院使冬十月庚寅
爲太師伽頭建第給鈔二萬錠癸巳蒲縣陵縣地震
甲午以阿沙不花知樞密院事丁酉以大都艱食復糶
米十萬石減其價以賑之以其鈔於江南和糴罷大
都權酤賜皇太子金千兩辛丑太白犯南斗癸卯中
書省臣請以湖廣米十萬石貯於揚州江西江浙海
漕三十萬石內分五萬石貯朱汪利津二倉以濟山
東饑民從之敕凡持內降文記買河間鹽及以諸王
駙馬之言至運司者一切禁之持內降文記不由中
書者聽運司以聞禁奉符長清泗水章丘霑化利津
無棣七縣民田以獵甲辰從帝師請以釋教都總管朶
兒只八兼領囊八地產錢物爲都總管府達魯花赤
總其財賦以西番僧教瓦班爲翰林承旨左丞相知
樞密院事鐵木兒不花加錄軍國重事中書右丞司
徒秃忽魯河南江北行省右丞也速內史脫孛花並
知樞密院事乙巳改護國仁王寺昭應規運總管府

爲會福院秩從二品丙午立興聖宮掌醫監秩正三
品十一月己未中書省臣言世祖時省院臺及諸司
皆有定員後略有增者成宗已嘗有旨併省邇者諸
司遞陞四品者三品三品者二品二品者一品一司甚至
二三十員事不改舊而官日增請依大德十年已定
員數冗濫者從各司自與減汰衙門既陞諸吏止從舊
秩出官果應例者自如選格從之庚申太白晝見以
軍五千人供造寺工役增官吏俸以至元鈔依中統
鈔數給之止其祿米歲該四十萬石吏員以九十月
出身如舊制詔免紹興慶元台州建康廣德田租紹
興被災尤甚今歲又旱凡佃戶止輸田主十分之四
山場河灤商稅截日免之諸路小稅審被災者免之
乙丑賜諸王南木忽里金印丁卯中書省臣言今銓
選錢糧之法盡壞廩藏空虛中都建城大都建寺及
爲諸貴人營私第軍民不得休息邇者用度愈廣每
賜一人輒至萬定惟陛下矜察又言銓選錢糧諸司
乞毋干預帝曰已降制書令諸人毋干中書之政他
日或有乘朕忽忘持內降文記及傳旨至中書省其
執之以來朕將加罪以也兒吉兒爲御史大夫己巳
以乞台普濟爲右丞相脫脫爲左丞相既又從脫脫

言以塔思不花與乞台普濟俱爲右丞相中書省臣言國用不給請沙汰宣徽太府利用等院籍定應給人數其在上都行省者委官裁省又行泉院專以守寶貨爲任宜禁私獻寶貨者又天下屯田百二十餘所由所用者多非其人以致廢弛除四川甘州應昌府雲南爲地絕遠餘當選習農務者往與行省宣慰司親履其地可興者興可廢者廢各具籍以聞並從之詔開寧路及宣德雲州工役供億浩繁其賦稅除前詔已免三年外更免一年辛巳罷益都諸處合刺赤等狩獵以銀七百五十兩鈔二千二百錠帶帛三

百疋施昊天寺爲水陸大會癸未皇太后造寺五臺山摘軍六千五百人供其役閏十一月己丑以大都米貴發廩十萬石減其價以糶賑貧民北來民饑有鬻子者命有司爲贖之乙未賜故中書右丞相完澤妻金五百兩銀千五百丙申罷江南進沙糖止富民輸粟賑饑補官丁酉禁江西湖廣汴梁私捕鴛鴦已亥罷遼陽省進雕豹貴赤衛受烏江縣達魯花赤獻私戶萬令隸縣官壬寅乞台普濟乞賜固安田二百餘頃從之乙巳中書省臣言回回商人持璽書佩虎符乘驛馬名求珍異既而以一豹上獻復邀回賜似

此甚衆臣等議虎符國之信器驛馬使臣所需今以
畀諸商人誠非所宜乞一槩追之制可罷順德廣平
鐵冶提舉司聽民自便有司稅之如舊丁未復立汴
梁路之項城縣以杭州紹興建康等路歲比饑饉今
年酒課免十分之三敕河西僧戶準先朝定制從軍
輸稅一與民同甲寅荅刺罕哈刺孫卒十二月庚
申封和卽撒爲隴王賜金印平江路民有隸謹的里
部者依舊制差賦與民一體均當雲南畏吾兒一千
人居荆襄雲南省臣言世祖有旨使歸雲南以佐征
討中書省臣議發還爲是從之中都立開寧縣降隆
興爲源州陞蔚州爲蔚昌府省河東宣慰司以大同
路隸中都留守司冀寧晉寧二路隸中書省甲戌以
平章政事商議中書省事太子賓客王太亨行太子
詹事平章軍國重事太子少詹事大慈都爲太子詹
事賜御史甚官及監察御史宴服

本紀卷第二十三

元史二十三

翰林學士雷大英知制誥修國史長蘄翰林待制承直郎知制誥國史院編修官臣王禕等奉

武宗二

二年春正月己丑從皇太子請罷宮師府設賓客諭德贊善如故庚寅越王禿剌有罪賜死禁日者方士出入諸王公主近侍及諸官之門辛卯皇太子諸王百官上尊號曰統天繼聖欽文英武大章孝皇帝乙未恭謝太廟丙申詔天下弛山澤之禁恤流移毋令見戶包納差稅被災百姓內郡免差稅一年江淮免

夏稅內外大小職官普覃散官一等有出身人考滿者加散官一等己亥封知樞密院事容國公床兀兒爲句容郡王乙巳塔思不花乞台普濟言諸人恃恩徑奏璽書不由中書直下翰林院給與者今覈其數自大德六年至至大元年所出凡六千三百餘道皆千田土戶口金銀鐵冶增餘課程進貢奇貨錢穀選法詞訟造作等事害及於民請盡追奪之今後有不由中書者乞勿與制可丙午定制大成至聖文宣王春秋二丁釋奠用大牢戊申迭里帖木兒不花進鷹犬命歲以幣帛千匹鈔千錠與之二月戊午鑄金印賜句容郡王床兀兒賑真定路饑民糧萬石搭搭境六千石癸亥皇太子幸五臺佛寺罷行泉府院以市舶歸之行省乙丑以和林屯田去秋收九萬餘石其宣慰司官吏部校軍士給賞有差己巳太陰犯亢辛未太陰犯氐調國王部及忽里合赤兀魯帶朶來等軍九千五百人赴和林壬申令各衛董屯田官三年一易甲戌弛中都酒禁三月己丑遼陽行省右丞洪重喜訴高麗國王王童不奉國法恣暴等事中書省臣請令重喜與高麗王辯對敕中書毋令辯對令高麗王從太后之五臺山梁王在雲南有風疾以諸王

老的代梁王鎮雲南賜金二百五十兩銀七百五十兩從者幣帛有差庚寅車駕幸上都摘五衛軍五十人隸中都虎賁司封諸王也不干爲襄寧王辛卯罷杭州白雲宗攝所立湖廣頭陀禪錄司丙寅賜雲南王老的金印戊戌太陰犯氐己亥熒惑犯歲星封公主阿刺的納八刺爲趙國公主駙馬注安爲趙王甲辰中書省臣言國家歲賦有常頃以歲儉所入曾不及半而去歲所支鈔至千萬錠糧三百萬石陛下嘗命汰其求芻粟者而宣徽院李可孫竟不能行視去歲反多三十萬石請用知錢穀者二三員於宣徽院

佐而理之又中書省斷事官大德十年四十三員今皇太子位增二員諸王闊闊出刺馬甘禿刺亦各增一員非舊制臣等以爲皇太子位所增宜存諸王者宜罷並從之陸掌醫署爲典醫監乙巳中書省臣言中書爲百司之首宜先汰冗員帝曰百司所汰卿等定議省臣去留朕自思之己酉濟陰定陶雹夏四月甲寅中書省臣言江浙杭州驛半歲之間使人過者千二百餘有桑元寶合丁等進獅豹鴉鶻留二十有七日人畜食肉千三百餘斤請自今遠方以奇獸異寶來者依驛遞其商人因有所獻者令自備資力從之

辛酉立興聖宮江淮財賦總管府詔諭中外癸亥摘
漢軍五千給田十萬頃於直沽汳海口屯種又益以
康里軍二千立鎮守海口屯儲親軍都指揮使司壬
午詔中都劄皇城角樓中書省臣言今農事正殷蝗
蝻徧野百姓艱食乞依前旨罷其役帝曰皇城若無
角樓何以壯觀先畢其功餘者緩之以建新寺鑄提
調監造三品銀印益都東平東滄濟寧河間順德廣
平大名汴梁衛輝泰安高唐曹濮德揚滁高郵等處
蝗五月丁亥以通政院使熬刺合兒知樞密院事董
建興聖宮令大都留守養安等督其工丁酉以陰陽
家言自今至聖誕節不宜興土功敕權停新寺工役
甲辰御史臺臣言乘輿北幸而京師工役正興加之
歲旱乏食民愚惑所關甚重乞留一丞相鎮京師
後爲例制可六月癸亥選官督捕蝗從皇太子言禁
諸賜田者馳驛徵租擾民庚午中書省臣言奉旨既
停新寺工役其亭苑鷹坊諸役乞并罷又太醫院遣
使取藥材於陝西四川雲南費公帑勞驛傳臣等議
事干錢糧隔越中書省徑行乞禁止並從之以益都
濟南般陽三路寧海一州屬宣慰司餘並令直隸省
部以大都隸儒籍者四十戶充文廟樂工從皇太子

請改典樂司提點大使等官爲卿少卿丞甲戌以宿衛之士比多冗雜遵舊制存蒙古色目之有闕闕者餘皆革去皇太子言宣政院先奉旨毆西番僧者截其手詈之者斷其舌此法昔所未聞有乖國典且於僧無益僧俗相犯已有明憲乞更其令又言宣政院文案不檢覈於憲章有礙遵舊制爲宜並從之乙亥中書省臣言河南江浙省言宣政院奏免僧道也里可溫答失蠻租稅臣等議田有租商有稅乃祖宗成法今宣政院一體奏免非制有旨依舊制徵之是月金城崞州源州雨雹延安之神木碾谷盤西神川等處大雨雹霸州檀州涿州良鄉舒城歷陽合肥六安江寧句容溧水上元等處蝗秋七月癸未河決歸德府境壬辰宣政院臣言武靖王搠思班與朶思麻宣慰司言松潘疊宕威茂州等處安撫司管內西番禿魯卜降胡漢民四種人雜處昨遣經歷蔡懋昭往蛇谷隴迷招之降其八部戶萬七千皆數百年負固頑獷之人酋長令真巴等八人已嘗廷見今令真巴謂其地隣接四川未降者尚十餘萬宣撫司官皆他郡人不知蠻夷事宜纔至成都灌州畏懼即返何以撫治宜改安撫司爲宣撫司遷治茂州徙松州軍千人

鎮遏爲便臣等議宜從其言詔改松潘疊宕威茂州
安撫司爲宣撫司遷治茂州汶川縣秩正三品以八
兒思的斤爲宣撫司達魯花赤蔡懋昭爲副使並佩
虎符乙未復置贛州龍南安遠二縣以河西二十驛
往來使多馬數既少民力耗竭命中書省樞密院通
政院於諸部撥戶增馬以濟之樂實言鈔法大壞請
更鈔法圖新鈔式以進又與保八議立尚書省詔與
乞台普濟塔思不化赤因鐵木兒脫虎脫集議以聞
已亥河決汴梁之封丘甲辰改昔保赤八刺合孫總
管府爲奉時院乙巳保八言臣與塔思不花乞台普
濟等集議立尚書省事臣今竊自思之政事得失皆
前日中書省臣所爲今欲舉正彼懼有累孰願行者
臣今不言誠以大事爲懼陛下若矜憐保八樂實所
議請立尚書省舊事從中書新政從尚書尚書請以
乞台普濟脫虎脫爲丞相三寶奴樂實爲平章保八
爲右丞王巖叅知政事姓江者畫鈔式以爲印鈔庫
大使並從之塔思不花言此大事遽爾更張乞與老
臣更議帝不從是月濟南濟寧般陽曹滌德高唐河
中解絳耀同華等州蝗八月壬子中書省臣言甘肅
省僻在邊垂城中蓄金穀以給諸王軍馬世祖成宗

常修其城池近撒的迷失擅興兵甲掠虜王出伯韜
重民大驚擾今撒的迷失已伏誅其城若不修慮啓
寇心又沙瓜州摘軍屯田歲入糧二萬五千石撒的
迷失叛不令其軍入屯遂廢今乞仍舊遣軍屯種選
知屯田地利色目漢人各一員領之皆從之癸酉立
尚書省以乞台普濟爲太傅右丞相脫虎脫爲左丞
相三寶奴樂實爲平章政事保八爲右丞忙哥鐵木
兒爲左丞王罷爲參知政事中書左丞劉楫授尚書
左丞商議尚書省事詔告天下甲寅敕以海刺孫昔
與伯顏阿木平江南知兵事可授平章政事商議樞
密院事以阿速衛軍五百人隸諸王怯里不花駐和
林給鈔萬五千錠人備四馬己未立皇太子右衛率
府秩正三品命尚書右丞相脫虎脫御史大夫不里
牙敦並領右衛率府事尚書省臣言中書省尚有浦
欠錢糧應追理者宜存斷事官十人餘皆併入尚書
省又言徃者大辟獄具尚書省議定令中書省裁酌
以聞宜依舊制從之以江西等處行中書省參知政
事郝彬爲尚書省參知政事甲戌賜大師瓜頭名脫
兒赤顏丁丑永平路隕霜殺禾己卯三寶奴言尚書
省立更新庶政變易鈔法用官六十四員其中宿衛

之士有之品秩未至者有之未歷仕者有之此皆素
習於事既已任之乞勿拘例授以宣敕制可詔天下
敢有沮撓尚書省事者罪之真定保定河間順德廣
平彰德大名衛輝懷孟汴梁等處蝗九月庚辰朔以
尚書省條畫詔天下改各行中書省爲行尚書省詔
朝廷得失軍民利害臣民有上言者皆得實封上聞
在外者赴所屬轉達各處人民飢荒轉徙復業者一
切逋欠並行蠲免仍除差稅三年田野死亡遺骸暴
露官爲收拾頒行至大銀鈔詔曰昔我世祖皇帝既
登大寶始造中統交鈔以便民用歲久法隳亦既更
張印造至元寶鈔逮今又復二十三年物重鈔輕不
能無弊廼循舊典改造至大銀鈔頒行天下至大銀
鈔一兩準至元鈔五貫白銀一兩赤金一錢隨路立
平準行用庫買賣金銀倒換昏鈔或民間絲綿布帛
赴庫回易依驗時估給價隨處路府州縣設立常平
倉以權物價豐年收糴粟麥米穀值青黃不接之時
比附時估減價出糶以遏沸湧金銀私相買賣及海
舶興販金銀銅錢綿絲布帛下海者並禁之平準行
用庫常平倉設官皆於流官內銓注以二年爲滿中
統交鈔詔書到日限一百日盡數赴庫倒換茶鹽酒

醋商稅諸色課程如收至大銀鈔以一當五頒行至
大銀鈔二兩至二釐定為一十三等以便民用壬午
江南行臺劾平章政事教化詐言家貧冒受賜貨物
折鈔二萬錠且其人素行無一善可稱魏國公尊爵
也豈宜授之請追奪為宜制可癸未尚書省臣言古
者設官分職各有攸司方今地大民衆事益繁冗若
使省臣總挈綱領庶官各盡厥職其事豈有不治頃
歲省務壅塞朝夕惟署押文案事皆廢弛天裁民困
職此之由自今以始省部一切皆令從宜甄置大事
或須上請得旨即行用成至治上順天道下安民心

又言國家地廣民衆古所未有累朝格創前後不一
執法之吏輕重任意請自太祖以來所行政令九千
餘條刪除繁冗使歸於一編為定制並從之以大都
城南建佛寺立行工部領行工部事三人行工部尚
書二人仍令尚書右丞相脫虎脫兼領之丙戌車駕
至大都戊子尚書省臣言翰林國史院先朝御容實
錄皆在其中鄉置之南省今尚書省復立倉卒不及
營建請買大第徙之制可壬辰賜高唐王注安金五
千兩銀五萬兩癸巳以薪價貴禁權豪畜鷹犬之家
不得占據山場聽民樵采三寶奴言冀寧大同保定

真定以五臺建寺所湏皆直取於民宜免今年租稅
從之丙申御史臺臣言頃年歲凶民疫陛下哀矜賑
之獲濟者衆今山東大饑流民轉徙乞以本臺沒入
賊鈔萬錠賑救之制可丁酉御史臺臣言比者近幸
爲人奏請賜江南田千二百三十頃爲租五十萬石
乞拘還官從之己亥尚書省臣言今國用需中統鈔
五百萬錠前者嘗借支鈔本至千六十萬三千一百
餘錠今乞罷中統鈔以至夫銀鈔爲母至元鈔爲子
仍撥至元鈔本百萬錠以給國用大都立資國院秩
正二品山東河東遼陽江淮湖廣川漢立泉貨監六
秩正三品產銅之地立提舉司十九秩從五品尚書
省臣言三宮內降之旨曩中書省奏請勿行臣等謂
宜仍舊行之儻於大事有害則復奏請帝是其言又
言中書之務乞以盡歸臣等至元二十四年凡宣敕
亦尚書省掌之今臣等議乞從尚書省任人而以宣
敕散官委之中書從之占八國王遣其弟扎刺奴等
來貢白面象加藍木合魯納答思秃堅鐵木兒桑加
失里等奏請遣人使海外諸國以秃堅張也先伯顏
使不憐八孫薛徹兀李唐徐伯顏使八昔察罕亦不
刺金楊忽答兒阿里使占八以陝西行臺大夫大司

徒沙的爲左丞相行士蕃等處宣慰使都元帥甲辰
尚書省言每歲芻粟費鈔五十萬錠請廢李可孫立
度支院秩二品設使同知僉院僉判各二員從之乙
巳以盜多徙上都中都大都舊盜於水達達亦刺思
等地耕種丁未三寶奴言養豹者害民爲甚有旨禁
之有復犯者雖貴幸亦加罪冬十月庚戌朔以皇太
子爲尚書令詔天下令州縣正官以九年爲任詔天
下又以行銅錢法詔天下辛亥皇太子言舊制百官
宣敕散官皆歸中書以臣爲中書令故也自今敕牒
宜令尚書省給降宣命仍委中書制可丙辰樂實言
江南平垂四十年其民止輸地稅商稅餘皆無與其
富室有蔽占王民奴使之者動輒百千家有多至萬
家者其力可知乞自今有歲收糧滿五萬石以上者
令石輸二升於官仍質一子而軍之其所輸之糧移
其半入京師以養御士半留於彼以備凶年富國安
民無善於此帝曰如樂實言行之辛酉弛酒禁立酒
課提舉司尚書省以錢穀繁劇增戶部侍郎員外郎
各一員又增禮部侍郎郎中各一員凡言時政者屬
之立太廟廩犧署設令丞各一員癸亥以翰林學士
承旨不里牙敦爲御史大夫乙丑以皇太后有疾詔

天下釋大辟百人丁卯以御史大夫只兒合郎及中書左丞相脫脫尚服院使大都並知樞密院事壬申太陰犯左執法癸酉尚書省臣言比來東汰冗官之故百官俸至今未給乞加大德十年所設員數給之餘弗給從之加知樞密院事禿忽魯左丞相丁丑以遼陽行尚書省平章政事合散爲左丞相行中書省平章政事中書參知政事伯都爲平章政事行中書右丞商議中書省事忽都不丁爲右丞行中書省左丞參議中書省事鐵里脫歡賈鈞並中書參知政事戊寅御史臺臣言常平倉本以益民然歲不登遽立之必反害民罷之便又言至大銀鈔始行品目繁碎民猶未悟而又兼行銅錢慮有相妨又言民間抱銅器甚急弗便乞與省臣詳議又言歲凶乏食不宜遽弛酒禁有旨其與省臣議之十一月庚辰朔以徐邳連年大水百姓流離悉免今歲差稅增吏部郎中貞外郎主事各一員令考功以行黜陟東平濟寧荐饑免其民差稅之半下戶悉免之尚書省臣言比年衛士大濫率多無賴請充衛士者必廷見乃聽從之雲南行省言八百媳婦大徹里小徹里作亂威遠州谷保奪據木羅甸詔遣本省右丞筭只兒威往招諭之

仍令威楚道軍千五百人護送入境而筭只兕威受
谷保賂金銀各三定復進兵攻劫谷保弓弩亂發遂
以敗還匪惟敗事反傷我人惟陛下裁度帝曰大事
也其速擇使復齋璽書往招諭筭只兕威雖遇赦可
嚴鞠之甲申賜寧肅王脫脫金印陞皇太子府正司
為從二品乙酉尚書省及太常禮儀院言郊祀者國
之大禮今南郊之禮已行而未備北郊之禮尚未舉
行今年冬至祀天南郊請以太祖皇帝配明年夏至
祀地北郊請以世祖皇帝配制可丁亥以湖廣行省
左丞散朮帶為平章政事商議樞密院事丁酉太尉
尚書右丞相脫虎脫監修國史己亥太陰犯右執法
庚子大陰犯上相辛丑尚書省臣言臣等竊計國之
糧儲歲費浸廣而所入不足今歲江南頗熟欲遣使
和糴恐米價暴增請以至大鈔二千錠分之江浙河
南江西湖廣四省於來歲諸色應支糧者視時直予
以鈔可得百萬不給則聽以各省錢足之制可丙午
諸王孛蘭奚以私怨殺人當死太宗正也可扎魯忽
赤議孛蘭奚貴為國族乞杖之流北鄙從軍從之丁
未擇衛士子弟充國子學生十二月乙卯親饗太廟
上太祖聖武皇帝尊謚廟號及光獻皇后尊謚又上

睿宗景襄皇帝尊謚廟號及莊聖皇后尊謚執事者人陞散階一等賜太廟禮樂戶鈔帛有差和林省右丞相太師月赤察兒言臣與哈刺哈孫答刺罕共事時錢穀必與臣議自哈刺哈孫沒凡出入不復關聞予奪失當而右丞曩家帶互相凌侮輒託故赴京師有旨其鎖曩家帶詣和林鞠之武昌婦人劉氏詣御史臺訴三寶奴奪其所進亡宋玉璽一金椅一夜明珠二奉旨令尚書省臣及御史中丞冀德方也可扎魯忽赤別鐵木兒中政使糊只等雜問劉氏稱故程萬戶妻三寶奴謫武昌時與留往來及三寶奴貴劉託以追逃婢來京師謂三寶奴於其家不答入其西廊見榻上有逃婢所竊寶鞍及其手縫錦帕以問三寶奴又不荅忿恨而出即求書狀人喬瑜爲狀乃因尹榮往見察院吏李節入訴於臺獄成以劉氏爲妄有旨斬喬瑜答李節杖劉氏及尹榮歸之元籍丙辰併中書省左右司遣使往諸路分揀逋負合徵者徵之合免者免之庚申太陰犯參尚書省臣言鹽價每引宜增爲至大銀鈔四兩廣西者如故其煮鹽工本請增爲至大銀鈔四錢制可辛酉申禁漢人執弓矢兵仗壬戌陽曲縣地震有聲如雷封西僧迷不韻子

爲寧國公賜金印丁丑詔增百官俸定流官封贈等第應封贈者或使遠死節臨陣死事於見授散官上加之若六品七品死節死事者驗事特贈官封贈內外百官三品以上者許請謚凡請謚者許其家具本官平日勲勞政績德業藝能經由所在官司保勘與本家所供相同轉申吏部考覆呈都省都省準擬令太常禮儀院驗事蹟定謚若勲戚大臣奉旨賜謚者不在此例

三年春正月癸未省中書官吏自客省使而下一百八十一員賜諸王那木忽里等鈔萬二千錠賜宣徽院使拙忽難所隸酒人鈔萬五百八十八錠乙酉特授李孟榮祿大夫平章政事集賢大學士同知徽政院事丁亥白虹貫日戊子禁近侍諸人外增課額及進他物有妨經制營五臺寺役工匠千四百人軍三千五百人已丑以紐隣參議尚書省事庚寅立司裡監秩正三品掌巫覡以丞相釐日領之辛卯立皇后弘吉列氏遣脫虎脫攝太尉持節授玉冊壬辰陞中政院爲從一品癸巳立中瑞司秩正三品掌皇后寶甲午太陰犯右執法乙未定稅課法諸色課程並係大德十一年考較定舊額元增總爲正額折至

元鈔作數自至大三年爲始恢辦餘止以十分爲率
增及三分以上爲下酬五分以上爲中酬七分以
爲上酬增及九分爲最不及三分爲殿所設資品官
員以二周歲爲滿定稅課官等第萬錠之上設正提
舉同提舉副提舉各一員一千錠之上設提領大使
副使各二員五百錠之上設提領大使副使各一員
一百錠之上設大使副使各一員丙申立資國院泉
貨監命以歷代銅錢與至大錢相參行用復立廣平
順德路鐵冶都提舉司戊戌詔湖廣行省招諭叛人
上思州知州黃勝許辛丑降詔招諭大徹里小徹里

樞密院臣言湖廣省垂西帶蠻阿馬等連結萬人入
寇已遣萬戶移刺四奴領軍千人及調思播土兵併
力討捕臣等議事勢緩急地里要害四奴備知乞聽
其便宜調遣制可壬寅詔諭八百媳婦遣雲南行省
右丞筭只兒威招撫之癸卯改太子少詹事爲副詹
事乙巳令中書省官吏如安童居中書時例存設其
已汰者尚書省遷叙省樞密院官存知樞密院七員
同知樞密院事二員樞密副使二員僉樞密院事二
員同僉樞密院事一員增御史臺官二員御史大夫
御史中丞侍御史治書侍御史各二員省通政院官

六負存十二負汰廣武康里衛軍非其種者還之元籍凡隸諸王阿只吉火即撤及迤南探馬赤者令樞密院遣人即其處參定爲籍去歲朝會諸王伯鐵木兒阿刺鐵木兒並賜金二百五十兩銀一千兩鈔四百錠丙午詔令知樞密院事大都僉院合剌合孫復職丁未立右衛阿速親軍都指揮使司秩正三品二月庚戌以皇后受冊遣官告謝太廟辛亥熒惑犯月星賜鷹坊馬速忽金百兩銀五百兩已未浚會通河給鈔四千八百錠糧二萬一千石以募民命河南省平章政事塔失海牙董其役遣商議尚書省事劉楫

整治鈔法增大都警巡院二分治四隅壬戌太陰犯左執法甲子以上皇太后尊號告祀南郊乙丑復以僉樞密院事賈鈞爲中書參知政事尚書省臣言官階差等已有定制近奉聖旨懿旨令旨要索官階者率多躡等願依世祖皇帝舊制次第給之制可丁卯尚書省臣言昔至元鈔初行即以中統鈔本供億及銷其板今既行至大銀鈔乞以至元鈔輸萬億庫銷毀其板止以至大鈔與銅錢相權通行爲便又言今夏朝會上都供億請先發鈔百萬錠以往並從之楚王牙忽都所隸戶貧乏以米萬石鈔六千錠賑之已

元史本紀卷之三十一
已寧王闊闊出謀爲不軌越王秃剌子阿剌納失里許助力事覺闊闊出下獄賜其妻完者死竄阿剌納失里及其祖母母妻子伯鐵木兒所以畏吾兒僧鐵里等二十四人同謀或知謀不首並磔于市鞠其獄者並陞秩二等賞牙忽都金千兩銀七千五百兩三寶奴賜號荅刺罕以闊闊出食品清州賜之自達魯花赤而下並聽舉用辛未脫兒赤顏加錄軍國重事賜故中書右丞相塔刺海妻也里千金七百五十兩銀一千五百兩鈔四百錠壬申樂實爲尚書左丞相駙馬都尉封齊國公癸酉以左丞相行中書省平章

政事合散商議遼陽行省事甲戌太白犯月星以上皇太后尊號告祀太廟三月己卯朔樞密院臣言國家設官分職都省治金穀樞密治軍旅各有定制邇者尚書省弗遵成憲易置本院官令依大德十年負數聞奏臣等議以鐵木兒不花脫而赤顏床兀兒也速脫脫也兒吉尼脫不花大都知樞密院事撒的迷失史弼同知樞密院事吳元珪樞密副使塔海姑令爲副樞有旨令樞密院如舊制設官十七員乙酉以知樞密院事只兒合郎爲陝西行尚書省平章政事遣刑部尚書馬兒往甘肅和市羊馬分資諸王那木

忽里蒙古軍給鈔七萬錠庚寅太陰犯氏尚書省臣
言昔世祖有旨以叛王海都分地五戶絲爲幣帛俟
彼來降賜之截二十餘年今其子察八兒向慕德化
歸覲闕廷請以賜之帝曰世祖謀慮深遠若是待諸
王朝會頒賞既畢卿等備述其故然後與之使彼知
愧辛卯發康里軍屯田永平官給之牛壬辰車駕幸
上都立興聖宮章慶使司秩正二品丙申太陰犯南
斗丁未太白犯井夏四月巳酉興聖宮鷹坊等戶四
千分處遼陽建萬戶府以統之容米洞官田墨糾合
蠻酋殺千戶及戍卒八十餘人俘掠良民改永順保

靖南渭安撫司爲永順等處軍民安撫司以安撫副
使梓材爲使往招之賜高麗國王王章功臣號改封
瀋王改大承華普慶寺總管府爲崇祥監庚戌以鈔
九千一百五十八錠有奇市耕牛農具給直沽酸棗
林屯田軍戊辰太白晝見巳巳立怯憐口諸色人匠
都總管府秩正三品提舉司二分治大都秩正五品
江浙等處財賦提舉司秩從五品瑞州等路營民都
提舉司秩從四品並隸章慶使司辛未賜角觥者阿
里銀千兩鈔四百錠丙子立管領軍匠千戶所秩正
五品割左都威衛軍匠八百隸之備興聖宮營繕增

國子生爲三百員靈壽平陰二縣雨雹鹽山寧津堂
邑荏平陽穀高唐禹城等縣蝗五月甲申封諸王完
者爲衛王癸巳東平人饑賑米五千石乙未加尚書
參知政事王巖大司徒是月合肥舒城歷陽蒙城霍
丘懷寧等縣蝗六月丁未朔詔太尉尚書右丞相脫
虎脫太保尚書左丞相三寶奴總治百司庶務並從
尚書省奏行戊申省上都留守司官七員以行中書
左丞忽都不丁爲中書右丞己酉立上都中都等處
銀冶提舉司秩正四品尚書省臣言別都魯思云雲
州朝河等處產銀令往試之得銀六百五十兩詔立

提舉司以別都忽思爲達魯花赤庚戌立規運都總
管府秩正三品領大崇恩福元寺錢糧置提舉司資
用庫大益倉隸之乙卯太陰犯氐和林省言貧民自
迤北來者四年之間靡粟六十萬石鈔四萬餘錠魚
網三千農具二萬詔尚書樞密差官與和林省臣覈
實給賜農具田種俾自耕食其績至者戶以四口爲
率給之粟丁巳敕今歲諸王妃主朝會頒賚一如至
大元年例甲子以太子詹事幹赤爲中書左丞集賢
使領典醫監事戊辰遣使諸道審決重囚賜太師淇
陽王月赤察兒清州民戶萬七千九百一十九安吉

王乞台普濟安吉州民戶五百壬申以西北諸王察
八兒等來朝告祀太廟賜脫虎脫三寶奴珠衣封三
寶奴爲楚國公以常州路爲分地乙亥陞晉王延慶
司秩正二品是月襄陽峽州路荆門州大水山崩壞
官解民居二萬一千八百二十九間死者三千四百
六十六人汝州大水死者九十二人六安州大水死
者五十二人沂州莒州兗州諸縣水沒民田威州洛
水肥鄉鷄澤等縣旱秋七月戊寅太陰犯右執法巳
卯太陰犯上相庚辰封皇伯晉王長女寶荅失憐爲
韓國長公主丙戌循州大水漂廬舍二百四十四間
死者四十三人發米賑之庚寅罷稱海也可扎魯忽
赤定王藥木忽兒乞如例設王府官六員從之癸巳
給親民長吏考功印曆令監治官歲終驗其行蹟書
而上之廉訪司御史臺尚書禮部考校以爲陞黜增
尚書省客省使副各一員直省舍人十四員立河南
打捕鷹坊魚課都提舉司秩正四品乙未中都立光
祿寺丁酉汜水長林當陽夷陵宜城遠安諸縣水令
尚書省賑恤之己亥禁權要商販挾聖旨懿旨令旨
阻礙會通河民船者壬寅詔禁近侍奏降御香及諸
王附馬降香者磁州威州諸縣旱蝗八月丁未以江

浙行尚書省左丞相忽剌出遙授中書右丞相釐日
並爲御史大夫詔諭中外甲寅白虹貫日陞尚服院
從一品丙辰以行用銅錢詔諭中外甲子獵于昴兀
腦兒之地己巳以諸王只必鐵木兒貧仍以西涼府
田賜之尚書省臣言今歲頒賚已多凡各位下奉聖
旨懿旨令旨賜財物者請分汰有旨卿等但具名以
進朕自分汰之汴梁懷孟衛輝彰德歸德汝寧南陽
河南等路蝗九月己卯平伐蠻酋不老丁遣其姪與
甥十人來降陞平伐等處蠻夷宣民安撫司同知陳
思誠爲安撫使佩金虎符御史臺臣言江浙省丞相

答失蠻於天壽節日毆其平章政事孛蘭奚事屬不
敬詔遣使詰問之內郡饑詔尚書省如例賑恤辛巳
太陰犯建星立宣慰司都元帥府於察罕腦兒之地
丙戌車駕至大都保八遙授平章政事辛卯太陰犯
天廩壬辰皇太子言司徒劉夔乘驛省親江南大擾
平民二年不歸詔罷之庚子以潭州隸中宮上都民
饑敕遣刑部尚書撒都丁發粟萬石下其價賑糶之
壬寅敕諸司官濫設者毋給月俸詔諭三寶奴等去
歲中書省奏諸司官負遵大德十年定制濫者汰之
今聞負冗如故有不以聞而徑之任者有旨不奏而

擅令之任及之任者並逮捕之朕不輕釋冬十月甲辰朔太白經天丙午太白犯左執法三寶奴及司徒田忠良等言曩奉旨舉行南郊配位從祀北郊方丘朝日夕月典禮臣等議欲祀北郊必先南郊今歲冬至祀園丘尊太祖皇帝配享來歲夏至祀方丘尊世祖皇帝配享春秋朝日夕月寔合祀典有旨所用儀物其令有司速備之又言太廟祠祭故用瓦尊乞代以銀從之戊申帝率皇太子諸王羣臣朝興聖宮上皇太后尊號冊寶曰儀天興聖慈仁昭懿壽元皇太后庚戌恭謝太廟癸丑熒惑犯亢甲寅敕諭中外民

尸託名諸王妃主貴近臣僚規避差徭已嘗禁止自今違者俾充軍驛及築城中都郡縣官不覺察者罷職封僧亦憐真乞烈思爲文國公賜金印御史臺臣言江浙省平章烏馬兒遣人從使臣昵匝馬丁枉道馳驛取贓吏紹興獄中釋之敕臺臣遣官往鞠毋徇私情山東徐邳等處水旱以御史臺沒入贓鈔四千餘錠賑之丁巳尚書省臣言宣徽院廩給日增儲待雖廣亦不能給宜加分減帝曰比見後宮飲膳與朕無異有是理耶其令伯荅沙與宣徽院官覈實分減之庚申敕尚書省事繁重諸司有才識明達者並從

尚書省選任樞密院御史臺及諸有司毋輒奏用違者論罪其或私意請托罷之不叙辛酉以皇太后受尊號赦天下大都上都中都比之他郡供給煩擾與免至大三年秋稅其餘去處今歲被災人戶曾經體覆依上蠲免內外不急之役截日停罷至大二年已前民間負欠差稅課程並行蠲免闊闕出餘黨未發覺者並原其罪隨處官民田土各有所屬諸人勿得陳獻三寶奴言省部官不肯勤恪署事敕自今晨集暮退苟或怠弛不必以聞便宜罪之其到任或一再月辭以病者杖罷不叙又言故丞相和禮霍孫時參

議府左右司斷事官六部官日具一膳不然則抱飢而還稽誤公事今則無以爲資乞各賜鈔二百錠規運取其息錢以爲食制可丁卯封諸王木八刺子買住韓爲克王壬申晉王也孫鐵木兒言世祖以張鐵木兒所獻地土金銀銅冶賜臣後以成宗拘叔諸王所占地土民戶例輸縣官乞回賜從之仍賜鈔三千錠賑其部貧民江浙省臣言曩者朱清張瑄海漕米歲四五十萬至百十萬時船多糧少顧直均平比歲賦斂橫出漕戶困乏逃亡者有之今歲運三百萬漕舟不足遣人於浙東福建等處和顧百姓騷動本省

左丞沙不丁言其第合八失及馬合謀但的澈浦楊家等皆有舟且深知漕事乞以爲海道運糧都漕萬戶府官各以已力輸運官糧萬戶千戶並如軍官例承襲寬恤漕戶增給顧直庶有成效尚書省以聞請以馬合謀但的爲遙授右丞海外諸蕃宣慰使都元帥領海道運糧都漕運萬戶府事設千戶所十每所設達魯花赤一千戶三副千戶二百戶四制可雲南省丞相鐵木迭兒擅離職赴都有旨詰問以皇太后旨貸免令復職以丞相鐵古迭兒爲陝西行御史臺御史大夫詔諭陝西四川雲南甘肅詔諭大司農司

勸課農桑十一月甲戌朔太白犯亢戊寅濟寧東平等路饑免曾經賑恤諸戶今歲差稅其未經賑恤者量減其半詔諭釐日移文尚書省凡憲臺除官事後勿與庚辰河南水死者給構漂廬舍者給鈔驗口賑糧兩月免今年租賦停逋責辛巳尚書省臣言今歲已印至大鈔本一百萬錠乞增二十萬錠及銅錢兼行以備侍衛及鷹坊急有所須又言上都中都銀冶提舉司達魯花赤別都魯思去歲輸銀四千二百五十兩今秋復輸三千五百兩且言復得新礦銀當增辦乞加授嘉議大夫並從之加脫虎脫爲太師錄軍

國重事封義國公壬午改大崇恩福元寺規運總管
府爲隆禧院秩從二品丁亥太陰犯畢戊子改皇太
子妃怯憐口都總管府爲典內司以益都寧海等處
連歲饑罷鷹坊縱獵其餘獵地並令禁約以俟秋成
尚書省臣言雲南省臨安大理等處宣慰司麗江宣
撫司及晉定路所隸部曲連結蠻寇殺掠良民諭之
不服且方調兵討八百媳婦軍力消耗今擬蒙古軍
人給馬一漢軍十人給馬二計直與之乞賜鈔三萬
錠又言四川行省紹慶路所隸容米洞田墨連結諸
蠻攻劫麻寮等寨方調兵討捕遣千戶塔木往諭田

墨施什用等來降宜立黃沙寨以田墨施什用爲千
戶塔木爲河東陝西等處萬戶府千戶所達魯花赤
廖起龍爲來寧州判官田思遠爲懷德府判官賞賚
遣還皆從之以朱清子虎張瑄子文龍往治海漕以
所籍宅一區田百頃給之尚書省臣言昔世祖命皇
子脫歡爲鎮南土居揚州今其子老章出入導衛僭
竊上儀勅遣官詰問仍以所僭儀物來上從之敕城
中都以牛車運土令各部衛士助之限以來歲四月
十五日畢集失期者罪其部長自願以車牛輸運者
別賞之江浙省左丞相荅失蠻江西省左丞相別不

花來朝賜世祖宮人伯牙倫金七百五十兩銀二千五百兩鈔六百錠丙申有事於南郊尊太祖皇帝配享昊天上帝己亥尚書省以武衛親軍都指揮使鄭阿児思蘭與兄鄭榮祖段叔仁等圖爲不軌置獄鞠之皆誣服詔叔仁等十七人並正典刑籍沒其家十二月甲辰朔以建大崇恩福元寺乞失刺遙授左丞曲列劉良遙授參知政事並領行工部事立崇輝署隸中政院戊申冀寧路地震己未諭中外應避役占籍諸王者俾充軍驛鎮南王老章僭擬儀衛究問有驗召老章赴闕

四年春正月癸酉朔帝不豫免朝賀大赦天下庚辰帝崩于玉德殿在位五年壽三十一壬午靈駕發引葬起輦谷從諸帝陵夏五月乙未文武百官也先鐵木兒等上尊謚曰仁惠宣孝皇帝廟號武宗國語曰曲律皇帝是日請謚南郊閏七月丙午祔于太廟武宗當富有之大業慨然欲創治改法而有爲故其封爵太盛而遙授之官衆錫賚太隆而泛賞之恩溥至元大德之政於是稍有變更云

本紀卷第二十三

元及本紀二十三

卅9562

3030

